



ГУДИ-ГУДИ

Кисса



...Ч дара шкарасидан овнок таңоридан
жекел-дүккән тошпарга сөк күйінб үркимдай-
үркимдай сүб бәйнег түшинб келади...

...Морина жой: зұтиёт бүлпесаныз,
жарға күнаб кейтши ҳер гап әмас.

Яқин-яқынгача қайси даврага кирмайин, орада энг ёши мен бўлиб чиқардим. Бугун қарасам – кўпчилиги мендан ёш... Ажабо, қачон, нега бундай бўлди?

...У дара ичкарисидаги овлоқ маконидан яккам-дуккам тошлиарга оёқ қўйиб лўкиллай-лўкиллай сув бўйига тушиб келади.

Тоз булоқларидан тўпланган сув мўъжиза йўллар билан кориз орқали ўтиб дара оғзида чөгроқ кўл ҳосил қилган. Кўл сатҳида вижир-вижир доира ясаб, икки харсангтоши орасидан бир тегирмон сув пастга оқади.

Қирғоқда қўйқайиб у бир нафас кўлга тикилади, сўнгра шошилмай шитонбогини ечади-да, сувга қараб чоптириб юборади. Шу асно этакка – қишлоқ тарафга тантанавор назар ташлаб қўяди.

Ишини битириб бўлгач, кўл лабига чўнқайиб ҳовучлай-ҳовучлай сувдан ичади...

* * *

– Маймун нариги дунёга кетганига минг йил бўлди, бориб нима қилдик! – дейди Маҳмуд боғбололик Салом чопагоннинг таъзиясидан чиққанимизда.

– Шунукига бориш керак-да, оғам, – дейман мен. Маймуннинг ўлганини эшитиб кечадан буён хаёлимда нималар айланаётганини у қаёқдан билсин!

Шеригим мошинасини истар-истамас боғ-боғот оралаб тоғ томон кетган тошлоқ торқўчага буради.

– Ўлган одамни ёмонлаб бўлмайди дейдилар-а, нимага? Ёмонни ёмон дейиш керак-ку!

– Одам-да, жўра, одам, – деб қўяман хаёлчан. – Тирилиб келиб ўзини ҳимоя қилолмаса!

– Маймунга айланган одам денг!

Қулогимга шу тобда бирон гап кирмайди.

* * *

Маймун синфда энг орқанг қаторда ўтиради. Олдинда бўлса, доскани тўсиб қўйиши тайин эди-да. Найнов, сугиги бузук, бесўнақай. Жимгина ўтирса ҳам кошки экан: гоҳ ёнига узалиб қўшни партадаги Маствура дарознинг сочидан тортади, гоҳ олдинги қаторга шоҳ ташлаб бирор тиш уриб турган олмами-бехига чанг солади. Ўқитувчи қўриб қолиб танбех бергудек бўлса, тиржайган кўйи дўриллайди: “Их, их, нима қиппан?”

У бизлардан тўрт-беш ёш катта, кўпимизнинг ё опа, ё акамиз билан ҳам синфдош бўлган. “Суриштириб қўринглар, бу хали биронтангнинг отанг биланми, энанг билан ҳам бирга ўқиган чиқар, – дер эди таптортмас Маҳмуд. – Билимга ташна-да, ўқиб чарчамайди”. Бунақа гапларга Маймун парво қилмайди, “их-их”лаб тиржайиб тураверади, жуда жонидан ўтказсангиз, “Салага!” деб қўяди, бас. Ё гапнинг фаҳмига етмайди, ё иззат-нафс деганини худо кўп кўрган. Овсар, довдиррок. Маймун-да. Бўлмаса-ку, Маҳмудга ўхшаганлар унинг дамигаёқ учиб кетади-я!

У мактабга онда-сонда келарди – бир эшак овора, аммасиникига тоғдан тезагу сомон ташимоқдан ортмайди. Келганида ҳам липпасида титилиб кетган аллақандай дарслик, қўйлагининг ичидаги неча буқланган бир дафтар, холос. Ручка-қаламни дарс маҳали униси-бунисининг қўлидан тортиб олади. Лекин на бир нарса ёзади, на бирор нарса ўқийди. Чамаси, ўқиш-ёзишни ҳам билмасди у. Ўлгудек нўноқ, “тупой” (Маҳмуднинг гапи).

Қарангки, шу туришида Маймун унча-мунча ўрисча чулдираб қоларди. Айниқса, сўкишларини қойиллатарди. Калхонадан ўрганиб келган. Оғзимиз очилиб ҳавас билан термилсак, “Их-их, тўти Катия бутининг орасига олиб бир қисса, хитойчаям гапириб юборасан!” дерди у.

Маймун Райма (Рахима – Райима) битлиқи билан ёнма-ён ўтиради. Шүрлик қызнинг битини бирор ушлаб күрмаган, лекин бошидаги рўмоли доим қийшайиб, қўски, ночорроқ кийимда юрганига “бит-мити ҳам бўлса керак” деган хаёлга борарди одам. У кишлоқнинг бир чеккасидаги ташландик, дару деворсиз ҳайҳотдек чорбоғда кўзи ожиз момоси билан яшарди. Ота-онаси ким, борми ўзи, бўлса қаерда – бирор билмасди. Райма битлиқи бор, унинг кўр момоси бор, тамом.

Пича тайтувроқ бу қиз ҳам “ака-опаларимиз билан ўқиган”лар сирасидан, Маҳмуд айтмоқчи, “Ё” синф ўқувчиларидан эди.

Баъзан дарснинг қоқ ўртасида Райма бетини чанглаб, пиқиллаб синфхонадан чиқиб кетар, ўқитувчи “Тожиқулов!” деб бакирса, Маймун шифтдай бўлиб тиржайиб турар эди: “Их, их, нима қиппан мен? Ўзи-ку, ўзи оёғини оёғимга ошириб ўтириди!”

Райма битлиқи шу кўйи ҳафталаб мактабга келмай кўярди. Бора-бора буткул кўринмай, бор-йўғи ҳам эсимиздан чиқиб кетди. (Хозир бормикан? Бўлса, қаерларда у шўрлик, бенаво синфдошим?)

Маймун аммасининг уйида юради. У ҳам гирт етимча: на отаси бор, на онаси. Бундан кўп йиллар бурун отаси бир кеча онасини чавоқлаб ташлаб, кўлида қонга беланган қассоби пичноқ, ўз оёғи билан милисаҳонага борган, кейин туман марказидаги чорбоғда очиқ суд бўлиб, қамалиб кетган. Судини ўзим кўрмаганман-у, аммо ўшандаги бири биридан хунук шов-шувлар қулогимда қолган: отувга хукм қилинибди, отилармиш; йўқ, тирик экан, йигирма беш йилга кесилибди; Сибирга жўнатганимиш, самолётда қишлоқ устидан ўтаётиб ҳовлисини мўлжаллаб хат ташлаган экан, хат тўпга-тўғри келиб чалпак пишираётган Майрам кампирнинг (онаси) қозонига тушибди, унда “Қайтиб келиб у ғарзотнинг бор уруғ-аймоғини пичноқдан ўтказмасам, энам хотиним бўлсин!” деб қасам ичиб ёзган эмиш; йўқ-йўқ, аллақачон отилиб кетган у, хўп денг энди, ўтган йили айни мана шундай саратон кунларида отилган, а-аник! Ва ҳоказо.

Мен бу гап-сўзларни ҳамиша гавжум, ҳамиша қизгин мачит-магазин айвонидаги гурунглардан билиб олганман, албатта. Бола ҳолимга.

Нимаям дердингиз, Маймунимиз ўша одамкүшнинг пуштикамаридан бино бўлган бир маҳлук-да! Айтгандай, қишлоққа кўчма зоопарк келиб кетганидан кейин у ростакам маймунга айланди – илгари оддийгина Мўмин ё Мўмин дароз, Мўмин найнов, энағар Мўмин, йўқ-йўқ, Мўмин кал эди, Мўмин кал!

Кал эмиш, унинг бошида мўйсиз жойи йўқ, бодроқдек, жингала-жингала! Бултур Қўшдарёга пахта теримига борганимизда шу бўй-басти, шу жингалаклари билан у кунуззукун пайкал оралаб юриб атиги тўрт килогина “оқ олтин” терган, кечкурун “штаб” чоғи жисмоний тарбия ўқитувчимиз Орзикулов уни холироқ хонага олиб кириб, жингалак сочларидан маҳкам чанглаб, кирза этик билан роса қорнига тепган – қани, миқ этса-чи, қани, бир тола сочи юлинса-чи!

Буни сўнгра Ваҳший (болалар қўйган лақаб) Орзикуловнинг ўзи ҳам таажжуб аралаш талай вақт нақл қилиб юрган: “Шу соламан денг, саси чиқмайди-я! Жони тошдан экан бу энағарнинг. Сочиям қайишдай, шунча ғижимлаб тортаман – бир мўйинни узолмасам-а, тавба! Анча-мунча қайфим ҳам бор эди ўзи”.

Маймуннинг талқини эса ўзгачароқ: “Епти шу гапига! Неча кун чатаногини кериб юрди-ку, қаерига тепганимни сўранглар ўзидан!”

* * *

Ялтир кал, чўтири кал, қўтири кал – шуларнинг барага қирон келди. Калларга, умуман, ўтмиш сарқити ҳисобланган калликка қарши ёппасига кураш бошланди. Коммунистик жамият қурувчиси ҳар жиҳатдан тўкис, соғлом, иложини топса, жингалаксоч бўлмоғи лозим эди. (Дарвоқе, шу фояни қўтариб чиқкан “бепоён юртим”нинг ўша кезлардаги бош подшоси ўзи шақ-шақ кал эди, ялтири кал! Бироқ унга қарши, йўқ-йўқ, унинг кал калласига қарши курашмок, яъни бошини даволамоқ ҳеч кимнинг

хаёлига келмасди. Бунинг иложи ҳам йўқ эди-да. Биринчидан, подшо жуда қари, демак, бошидаги иллат ҳам шунга яраша эски, маддалаб кетган – бедаво; қолаверса, ундан Баш каллани тиззалари орасига олиб мараздан то-залийдиган тўти Катия қайда дейсиз! Унақаси топилгудек бўлса ҳам, аввал ўзининг бошини тап-тақир қилиб борса-келмасга равона этиларди.)

Айни дарс қизиган палла дафъатан синфхонага мактаб директори ёки илмий мудир бошлиқ оқ халатли уч-тўрт дўхтири кириб келади. Бирор ёққа жуфтак ростлаб бўпсиз – тўрт тараф қопқон. Дўхтирлар қаторма-қатор юриб биттамабитта бош текширади: яра-чақаси йўқми, бўлса – юқумли кал эмасми? Ёнидаги шериги исм-фамилияларни ёзиб боради. Охирида машъум хукм ўқилади. Рўйхатга тушганлар изиллаб йиғлаган, бирори эшикка қараб қочишга уринган, кимдир – директорми, илмий мудирми уни кувлаган, яна бошқаси “ҳеч қаёққа бормайман” деб оёқ тираган, кимдир уни эшикка қараб судраган – хуллас, жаннат билан дўзах ўртасидаги қиёмат савдосининг ўзгинаси!

Бизнинг синфдан беш болада шундай иллат бор экан. Райма битлики ҳам кал бўлиб чиққанига нима дейсиз! Шўрлик қиз, энди ҳайҳотдек чорбоғда анови кўр момоси ёлғиз нима қиласкан-а? Келиб-келиб қиз болага қаёқдан юқибди? Қаёқдан бўларди – ёнма-ён ўтирадиган кўтирил кал Мўмин дароздан-да! “Иҳ-их, кал эмас-э бу, язнам ўроқ билан соглан жойлар-ку!” дея хирингларди у нукул.

Калликка маҳқум этилганлар шу ернинг ўзидаёқ касалхонанинг тешик-туйнуксиз маҳсус машинасига босиб олиб кетилди. Тўғри, уч кунми-тўрт кундан кейин улардан бири – Содиқ таранг қайтиб келди: кал эмас экан; бошидаги чақа жойлар оддий шукуфа бўлиб чиқиб, дори-пори суртиб унга жавоб берилибди.

Шу билан калларимизни икки ой чамаси мактабда кўрмадик. Улар туман шифохонасининг этагидаги юқумли касалликлар бўлими – калхонага элтиб ташланган эди. У ерга яқин йўлаб бўлмасди: аллақандай бадбўй ҳид! Ёнидан ўтиб қолсангиз, уч-тўрт кунгача димоғингизда макон куради.

Қочиб кетмасин дебми, каллар ҳатто касалхона ичидა ҳам бўйсира қилиб сафга тизиб қўйиларди. Кўргани балодан қочгандек қочарди улардан. Диққинафас жойда ётавериб ёвузлашган шекилли, айримлари сафдан чикасолиб устингизга отилар ва калласини ҳар ёғингизга суйкамоқ бўлар эди: “Юқсин, сенга ҳам юқсин!”

Собиқ калларнинг ўзи кейинчалик бизга гурунг беришича, даставвал изиллатиб соchlарини писка билан таптақир кирибди, сўнгра тўти (тётя) Катияга топширибди уларни. Бир хафта-ўн кун ўтгач, тўти Катия – эркакнамо, кети тандирдек келадиган барваста ҳамшира – бошга музлатадиган алламбало суртиб, иллат ин қурган жойлардаги соч толаларини мўйчинак билан битта-битта юлиб чиқар экан. Йўғ-э, оғрийди-ку! Бундай: аввал каллангни бақувват тиззалири орасига қисиб олади. Этагининг остиданми? У-у-увв, зўр-ку! Нимасини кўрдинг? Ўзи жонинг чиқаман деб турибди-ю, кўзингга бир нима кўринармиди! Оёгинг бу ёқда типиричилаб ётибди, сочингни битталаб суғуряпти, ёмон, ёмон! “Всё, всё, больше не могу!” деб чинқирасан, “Потерпи, дорогой, потерпи”, деб турори тўти Катия. Жонидан ўтиб кетган баъзилар “Бўлди, бўлди-е, энангни! Тўти Катия – кети катта-я!” деб бакир-чакир қилиб аламидан чиқмоқчи бўлар экан. Бир маҳал қарасанг – оёқларинг ости хўл бўлиб қолади. Нимага, ким? Тўти Катиями? Ким бўлсаям-да, ишқилиб, жиққа хўл!

Ҳароми Мўмин ўшанда этак остидан аллақаёққа қўл чўзиб юборган, дейишади. Тўти Катия унинг калласига муштлаб, “Ух, сволочь, зараза, а ну-ка убери руки!” деганиш. Мўмин энағар ҳиринглармиш: “Интересно, просто интересно”.

Соч юлиш азоби икки-уч бор такрорланганидан сўнг бошга малҳамдори суртиб, устидан дока қопланар экан. Худди немисларнинг тўнкарилган декчасимон қалпогига ўхшаб турори у. Ана шу “қалпок” қуриб, кўчиб тушса, тагидан соч, соғлом соч ўсиб чиқади. Кўпинча жингала-жингала!

Мўмин кал ҳам шифохонадан жингалаксоч бўлиб чиқди.

Аммо у барибир кал, Мўмин кал эди!

* * *

Биргина Мўмин эмас, тўти Катиянинг “бути орасидан ўтганлар”нинг деярли бари қуюқ-қалин сочли, баъзилари ҳатто ажиб жингалаксоч бўлиб қолгани рост. Боз устига, мактабда шунча ўқиб “твоя-моя”дан нари ўтолмаганларнинг икки ойгинада ўрисчадан киройи мулла бўлиб чиққанини айтмайсизми! (Тўти Катия “калсоз” ҳамширами ёки ўрис тили муаллимасимиди денг-а!) Лекин барибир “кал” лақаби уларнинг серсоч бошига мум сакичдек ёпишган эди.

Шу тариқа мактаб болалари орасида каллик иллатига қарши кураш ҳаракати муваффақиятли якун топди. Якун топишга топди-ю, анови бадбўй ҳид сира аримаганига нима дейсиз! Бу сабил бошнинг терисигагина эмас, мия-миягача сингиб кетганмидики, дам-бадам гупиллаб димоққа уарди. Камига денг, собиқ калларнинг аксарияти алланечук бети қаттиқ, шафқатсизрок бўлиб қолгандек.

Кора ўтмишдан кўтирилган сифатида турсин дейилдими ёки шунча одам ёппасига тўти Катиянинг мижозига айланса, шўрлик ҳамшира ҳарчанд бакуввату барваста бўлмасин, бундай кўламдор вазифага ёлғиз дош беролмай қолиши, боз устига, ёзги дала ишлари бирдан тўхтаб, порлоқ келажак пойдеворининг қурилиш суръатига футур этиши назарда тутилдими, ё балки адолатли замон афзалликларини яна бир карра таъкидламоқ мақсадидадир, хуллас, катта ёшли калларнинг бошига дахл қилинмади. Коммунизм қурувчи навқирон авлод (Мўмин кал ҳам шу сафда) соғлом бўлса бас; катта каллар – кечаги одам, эскидан қолган, эрта-индин ўтади-кетади, шундай бўлгач, тўти Катиянинг ҳалиги бадбўй, аммо ўлгудек шифобахш малҳамини ортиқча сарф этмоққа на ҳожат?!

Бироқ, мишишларга караганда, катта ёшлилардан факат Ваҳший Орзиқулов ёзги таътил чоги бир ой уйига қамалиб олиб, жадал муолажа усули билан тўти Катиянинг хизматидан “баҳраманд” бўлган эмиш. Ўлигутирикда бирдай эгнида спорт либоси, кўзлари аланг-жаланг, мудом қўли қичиб

турадиган жисмоний тарбия муаллимининг кейинги ўкув иилида баттар қутуриб, баттар ваҳшийлаб кетганига қараб дадил айтиш мумкинки, бу тахминларда жон бор эди.

Тўғри, унинг бошида соч Мўмин калники каби жингала бўлиб ўсмади, теп-текис, силлиқ, доим ялтираб туар, омбур билан ҳам бирор толасини суғуриб бўлмайдигандек мустаҳкам эди. Айтмоқчи, ким ҳам унинг силлиқ соchlаридан чанглаб олиб қорнига тепишига журъат қиласади!

* * *

Кўчма зоопарк туманимиз (у кезларда “район” деб аталаарди) тугатилганидан сал ўтиб, Мўмин кал ҳали маймунга айланмасидан олдин келган эди. Элнинг кўнглини кўтариш мақсадида марказдан атай юборилган, деган хulosага келди мачит-магазин ахли дарров.

Мамлакатга пахта керак эди, мўл-кўл пахта, “оқ олтин”! Тиниб-тинчимас Кал подшонинг кўли қичиб қолдими ёки хазинаси саёзлашиб кетдими, хуллас, унисини олиб бунисига уриб, туману вилоят деганларини бир-бирига кўшиб-аралаштириб-бирлаштириб юбораверди. Бунда асоссан фойда-заар жиҳати ҳисобга олинар, истиқболли ёки истиқболсиз дея баҳоланиб, табиийки, истиқболсиз, яъни давлат ҳисобига кун кўрувчи “текинхўр” томон истиқболли – сердаромад томонга қўшиб бериларди. Мағлуб келган тарафнинг тарихиу табиати, унда тириклилик қиласидан одамлар ким – истиқболлими, истиқболсизми, уларнинг феъл-автори қандай – буниси билан бирорнинг иши йўқ эди. Така бўлсин – сут берсин, бизга сути керак, сути, вассалом!

Бор мулки – теварак-атрофдаги тогу тошдан, бор давлати – пахта нималигини билмайдиган, билишни ҳам хоҳламайдиган, эртадан кечгача чойхонада ўтириб адолату сиёсатдан баҳс қилмоқнигина хуш кўрадиган маҳмадана, шинаванда, ўлгудек санъатсевар, ўзиям санъаткор элдан иборат Жийдали, машхур Жийдали текинхўр, истиқболсиз туман дея топилиб, ўн-ён беш ийлгина бурун ҳув бийдек бепоён даштда бино бўлиб, “йилдан-йил она Ватан хир-

монига мүл-күл “оқ олтин” карвонларини етказиб бераёт-ган”, ўзи ҳам йилдан-йилга бойиб-битиб бораётган машъял Күшдарё туманига қўшилди-юборилди!

Табиийки, шира-шарбат қайдা бўлса, марказ ҳам, раҳбарият ҳам ўша ерда бўлади. Марказ, табиийки, чўл бағрида қад ростлаган замонавий коммунистик шаҳарча – Дашибод деб белгиланган эди. Кўч-кўч бошланди. Жийдидаги майда-катта исмики ташкилот ё идора бор – барчаси кўчини кўтарди. Ингичкаю йўғон раҳбарлар амал курсиси-нинг изидан қоралаб кетган, ишсиз қолган бошқалар ҳам ўша ёқка, ёки бўлмаса, мўмайроқ пул чикадиган бўлак пахтакор манзилларга бош олиб жўнаган эди.

Бир замонлар бу гирд-атрофдаги энг баҳаво, майшати қулай эмин-эркин жой дея шу ерга ўрнашиб қолган тўти Катия ва унинг салмоқлигина қавмдошлари ҳам туман туғатилганидан сўнг колбасаю сариёғдан танглик сезибми, Дашибоду бошқа “обод”ларни кўйиб, тўппа-тўғри вилоят маркази сари жуфтак уриб қолди.

Улар кетгач, сершовкун чорбоғда тун-алламаҳалга қадар янграб турадиган оврупоча шўх оҳанглару рақслар тинди, кинохона биқинидаги муштлашувлар, оқшомги башанг кўча сайрлари ҳам барҳам топиб, жўшқин туман бамисоли бир сокин қабристон сиёгини олди.

Кечаги обод, гавжум Жийдалида энди факат қари-кури, хотин-халажу бола-бакра қолган, уч-тўртта нимжон идора ғимирлаб туар, хукуматдан иккитагина вакил бор эди: Аваз милиса билан Собир тўппонча. Тоға-жиян. Тоға идорада телефон кўриқлаб мудраб ўтирас, жиян – ёнбошида тўппонча ўрнига увада тиқилган филоф, кун бўйи чорбоғдаги чойхона теварагида жанжал пойлаб айланаб юрар эди. Шу, холос.

Кеч кузакка борибгина ризқ-рўз кидириб кетган эркаклар топган-тутганини белига боғлаб қайтиб келар, ана шунда Жийдали бир жонланиб, кўчалари яна гавжумлашиб, кечалари гап-гаштак авжига чиқар, беихтиёр туманинг ҳув серзавқ, файзиёб кунлари ёдга тушар эди. Кейин ҳадемай қиши ўтиб, олабахор келар-келмас, эркаклар яна серпул пахта далаларига йўл тортар, қишлоқни яна ўлик чиққан хона-дондек сукунат босиб, хувиллаб қолар эди.

Табиатан мағур, сердаъво Жийдали аҳли бундай адоплатсизликка сира кўниколмасди, бу ёги Тошкенту у ёги Москвага, ҳатто ундан ҳам нариларга шикоят ёзгани ёзган эди. Айниқса, туманларнинг бирлашуви хусусида шумхабар келган илк кунлардаги Жийдалини кўрсангиз! Ёшу қари кечаю кундуз кўчада. Ҳамма норози, ҳамма дарғазаб. Митинг десангиз ҳам шу, мотам десангиз ҳам шу. Энг алам қиладиган жойи Жийдалидек манзилнинг келиб-келиб ҳашаки бир Кўшдарёга қарам бўлиши эди!

(Бу гапларга энди кирқ йиллардан ҳам ошиб кетди-ёв. Сезган бўлсангиз, камина ўша замонлардан накъл қилаётирман.)

* * *

Жийдалидаги энг жанговар кураш ўчоқларидан бири бизнинг мачит-магазин эди.

Бозорбоши маҳалласининг қоқ ўртасида, толларга кўмилган сарҳовуз бикинида бино бўлган бу намозгоҳ замона зайли билан аралаш моллар дўконига айлантирилган, шундан эл-улус уни қўша қилиб “мачит-магазин” деб атар эди; мачит десангиз, ҳақингиз кетар – сербар айвонидаги қадимий ўймакор устунларни айтмаганда, на мачитлик, на бир муқаддаслик сиёғи қолган; яланггина магазин атамоқقا эса кўрқасиз – ҳарнечук, каломуллоҳ ўқилган, Қуръон оятлари тиловат этилган табаррук жой. Энг осон, бехавотири – “мачит-магазин”.

Бу даргоҳнинг кўчага қараган айвони доимо гавжум; бетартиб қалашиб ётган пахта тойлари, тuya-тарози, ёғдан бўшаган олапес бидонлару чойқутилар устига муқим ўрнашиб олган маҳалла пешволари – Соли бақироқ, Аҳад маҳсум, Исмоил телпакдўз, Ражаб қора ва узун-узун чопон кийган бошқа аҳли авом эрта баҳордан то совуқ тушгунга қадар оқшом чоғлари бунда масала талашади. Жонажон Жийдали, унга қўшиб жаҳоннинг тақдирини шу ерда ҳал этилади.

Мунозарачи-музокарачиларнинг бари бемалол ўтириб олиб фалсафа сўқади, албаттга. Сира ўтиргмаган, сира ўти-

ролмайдиган, мудом типпа-тик, айвон бўйлаб у ёқдан-бу ёққа бориб-келиб ваъз ўқийдиган биттагина шахс бор. Ҳа, оддий одам эмас, шахс. Ўзи ҳар икки гапининг бирида “менинг шахсимни”, “менинг шахсимга нисбатан” деб писанда килаверади. Ўрмон шахс. Лекин асли – Ўрмон калта.

Ўзини билган-билмаган мардум унинг орқасидан “игвогар”, “ёзғувчи” дея маломат отиб юрса-да, Ўрмон калта кечагина туман газетасининг кескир, муросасиз мухбири эди. Аттангки, туманлар бирлашиб, газета таҳририяти рақиблар юрти – Даشتободга қўчдию жанговар қалам заҳматкаши ишсиз қолди. Ўзининг таъбири билан айтганда эса, “Жийдалининг ҳақиқий патриоти сифатида уни тарк этишдан бош тортди”. Бекорчининг амали маълум: ҳақ учун, адолат учун курашмоқ! Сўнгги томчи қони қолгунча! Ўрмон калта шунга астойдил бел боғлаган шахс.

– Номи достонларда зикр этилган, ўзи қўшик-яллаларда мадҳэтилган шундоқсўлим, шундоқгўзал маскан ташландиқ бир бойўғлилар маконига айланиб қолди-я! Мен бунга асло чидаёлмайман! Шахс сифатида! Мустақил шахс сифатида! – дея тантанавор тарзда эълон қиласи Ўрмон калта.

Бу одамга тан бермай ҳам таажжу бланмай иложингиз ўйқ. Ўзи пак-пакана, аммо шашту шиддати баланд; юрганда – бўйин гоз, қўлларини аскар бола мисол силтаб-силтаб, лекин генералларга хос бир салобату сиёsat билан, иякбозлик мақомида ҳар ёнга назар сола-сола қадам ташлайди. Тўти Катияга мижоз тушмаган бўлса-да, бошидаги сарғиштоб сочи жингалага мойил. Кўкрак чўнтағида доим тўртта авторучка қаторлаштириб териб қўйилган, худди бешинчисини қўлида ростлаб олгану, индамасангиз, шу ернинг ўзида чўнқайиб олиб, кўрган-кузатгандарини шартта ёзib ташлайди-да, ҳозироқ аллақайга жўнатиб юборадигандек!

Билмаган киши уни тани носоғ деб ўйлаши ҳеч гап эмас. Менга ҳам у довдирроқ, мунтазам ичиб юрадиган шаробхўрдек туюларди. Бирор нимадан руҳи тушганини кўрмайсиз. Сўксангиз, очиқдан-очиқ ҳақорат қилсангиз ҳам ишшайиб, хандон отиб тураверади. Соғ одам шундай бўладими?

– Оғзингизга қараб гапириңг, мухбир! – дейди умрида секин сўзламоқни билмаган уккикўз Соли бақироқ одатдагидек овозининг борича. – Бойўғли деганингиз нимаси? Ким ташландиқ, ким бойўғли? Қани!

– Авом! Қип-қизил омисиз, Солибай! – Ўрмон калта бошини орқага ташлаб қах-қах уради. – Ахир, бу муболаға-ку! Мажоз дейдилар буни!

– Олимона гапларингизни киссангизга солиб қўйинг, хўй! Ким қизил? Ким қип-қизил?! – дея авж олади сарғишбашара Соли бақироқ бирдан қизариб, қип-қизариб.

– Ўзи-ку, ёза-ёз қилавериб Жийдалининг бошига етган сиз бўлдингиз, Ўрмонбой! – дейди ҳалигина дўкон ичида бир шиша портвейнни бўшатиб кўзлари қонталаш бўлиб чиққан Аҳад маҳсум.

– Шунақами? – Ўрмон калта яна қах-қах отиб кулади. – Ёзами! Тағин ёзамиз керак бўлса! – Кейин Аҳад маҳсумга бармоқ нуқиб таъкидлайди: – Бу сафар энди сизнинг устингиздан ёзами! “Масjidнинг вакғига шерик маҳсумвачча” деб сарлавҳа қўямиз. Қалай?

– Ёзинг, ёзинг. Биз қолувдик ўзи, – дейди дами ичига тушиб кетган Аҳад маҳсум.

– Ҳой биродарлар, бир-биrimизни ғажимоққа тўпландикми бу ерга? – дейди кекса телпакдўз гапга аралашиб.

– Ишдан гаплашайлик, ахир. Сизам анови қофозингизни ўқисангиз ўқинг энди, Ўрмонбой!

Ўрмон калта худди шу таклифни кутиб тургандек, қўлтиғидаги папкасидан сугуриб олган қофозни завқ-шавқ ва кироат билан ўқимоққа киришади:

– Москва! Кремль! КПСС Марказий Комитетининг биринчи секретари, Жийдали ахлининг яқин дўсти бўлмиш хурматли ўртоқ Никита Сер...

– У ёгини, у ёгини ўқинг энди, – деб луқма солади Соли бақироқ тажангланиб. – Бунисини кўп эшитганмиз!

– Қорли тоғлар бағридаги (чопон кийган ахли авомдан бир-иккиси беихтиёр тоғ томонга назар ташлайди: ҳозир қор-пори йўқ, демак, ёлғон гап), достонларда мадҳ этилган гўзал (буниси энди ростроқ) Жийдали бошига оғир мусибат

тушди. Яъниким, қон душманимиз бўлмиш қўшдарёликлар бизнинг тоғлардан оқиб келадиган зилол сувларимизни тортиб олиб, булғаб ётгани етмагандек...

– Ўчириңг! – деб ҳайкиради Соли бақироқ. – Шу жойи хотүғри ёзилган!

– Тўғри-да, – дейди Ражаб қора, – сувимизни улар тортиб олгани йўқ-ку, ўзи ўша тарафга қараб оққан-да!

– Ўчир! – дея яна бўкиради Соли бақироқ.

– Сувимизни уларга бериб, ўзимиз хом сув ичиб ўтирганимизни ҳам қўшиш керак эди, – деб қўяди чопон-лилардан бирори.

– Ўзи-ку хом сут ичган банда, бунинг устига ичадиган сувиям хом бўлса-я, э худойим-эй! – деб қўяди Аҳад маҳсум фифон аралаш.

– Сиз бошқасидан ҳам аралаштириб турибсиз, маҳсум, кўп нолиманг! – дейди Соли бақироқ ва дабдурустдан унинг куфри ошади: – Кўшдарёга қўшиб юбориб тўғри қилди хукумат, биздан энди одам чиқмайди, оғайнилар!

...Мўмин калнинг аслида маймунлигини ҳали ҳеч ким билмас эди...

– Шунча шоири олим қаердан чиққан экан бўлмаса, Со-либой? – дейди ватанпарварлик ҳамияти қўзиб Ўрмон калта.

– Шахсан донғи дунёга кетган “Дўмбира” ансамбли-чи!

– Улар чиққанда ҳали Кўшдарёга қўшилмаган эдик-да, ака, – дея заифгина луқма солади чопондор авомдан бири.

Ўрмон калта осмонга сапчигудек чийиллаб юборади:

– Кўшилмаймиз ҳам! У дунё-бу дунё қонимиз қўшилмаган улар билан, ҳа, билиб қўйинг!

Ана шу жазава устида мачит-магазин зинасига таникли қора тўриқ кўндаланг бўлади. Ўша замондаги жами уруш-куришларнинг ўлмас қаҳрамони, эски большевик Шўро бобомиз! Ҳамишагидек отда, ҳамишагидек раиси либосда: носранг ҳарбийнусха китель-шим, оёқда ялтиллаган хром этик, бошда сталинча шапка! Эрталаб уйдан чиққанлари, Жийдалининг ҳар бир кўчаю торкўчасини назоратдан ўт-казиб қайтиб келяптилар. Тарки одат – амримаҳол.

Айвон ахли эҳтиром юзасидан бир қалқиб қўяди. Одатдаги салом-алик. Шўро бобо отидан тушай демайди. Эгар-

ни ҳам бой берганига кўп замонлар бўлганига қарамай, сира отдан тушмаган!

– Қани, Ўрмонкул, биз кўл қўядиган қофозингдан қолган бўлса, опке! – дея амр қиласи у киши.

Ўрмон калта юргилаб айвон лабига боради, бояги чала ўқилган арзномани папкаси устига қўйиб Шўро бобога ту-таркан, кўкрак чўнтағида қаторлашиб турган авторучка-лардан энг равон ёзадиганини олиб узатади.

Шўро бобо имзо чекишдан аввал мухбирга важоҳат қиласи:

– Сиёсий хатоси йўқми?

– Йўқ, Шўро бобо, зўр! Ҳаммаси ўзингиз билгандек!

– Ну-у! Мана бўлмаса! – Ўрмон калтанинг ҳожатини чикарғач, Шўро бобо айвон тўридаги дўкон тарафга қараб товуш қиласи: – Хў Ҳабиббой! Опчиқ энди анови зангарингдан!

Бошқа ишини қўйиб атай шуни кутиб ўтиргандек, Ҳабибулло магазинчи бир қўлида қиррадор стакан – ярим-латилган, нариги кафтида уч-тўрт дона парварда, дархол айвон лабида ҳозир бўлади.

– Мана, мана, Шўро бобожон!

– Рухсат этсанг, – дея айвондаги жамоатга бир қур назар ташлаб олган Шўро бобо қўлидаги стаканга ишора қиласи, – ёвни барбод айлайн! – шундай деб у бир кўтаришда “анови занғар”ни ютадиу тўригининг жиловини бир силтаб қўйиб, байтининг давомини айтади: – Ундан сўғин ватанимга қайтайин!

Ватани – уйига қараб равона бўлаётган Шўро бобо:

– Ўрмонкул ука, – дейди орқасига қайрилиб, – хатинг-нинг бир жойига бизнинг номимиздан Будённий бобога салом айтиб қўйиш эсингдан чиқмасин-а, иним!

– Хўп, хўп, Шўро бобо, албатта! – деб қолади Ўрмон калта шунчаки, номига.

Лекин Шўро бобо шунчаки, номига бодилик қилаётгани йўқ. У ростдан ҳам ўша шопмўйлов қўмондонни кўрган, у билан учрашган. Босмачилик йиллари Будённий қишлоғимизга келганида сув ичган булоқ бўйида буни биз – пионерларга нақл қилиб ҳам берган эди.

Шўро бобо кетгач, ҳеч ким унинг орқасидан иғво қилмайди. Яхши одам Шўро бобомиз. Бирорвга озори йўқ, ўз кунига. Уруш йиллари фронтдан яраланиб келиб раис бўлганида колхоз омборхонасидағи бор ғаллани бева-бечорага тарқатиб, бир муддат қамалиб ҳам чиққан. “Не-не одамлар отилиб кетди, биз бўлсак бор-йўғи тўрт йилгина тут емадик, холос”, дея ғууруланиб юради ўзича.

Мен қачон Шўро бобони кўрсам, унинг думи ҳақидаги ҳангома ёдимга тушади ва беихтиёр шу нарса ўсиши мумкин бўлган жойига бир қараб қўяман. Тошкентга бориб кестириб келгани рост шекилли, ҳеч нарса сезилмайди.

Буни бизга зоология муаллимимиз Нуриллаев айтган эди. “Ҳайвонларга хос бўлган бундай аъзо баъзан одамларда ҳам учраши мумкин, – деган ва ҳаммани ҳайратга солиб жонли мисол келтирган: – Шўро бобони биласизлар-а, ана шу кишидаям бор эди, Тошкентга бориб кестириб келди”. Бу гапдан синфдаги барча билдирумайгина ўша жойига қўл юбориб, текшириб кўрган бўлса керак.

Бир куни уйда Шўро бобонинг думидан сўз очганим-да отам койиб берди: “Ким айтди буни сенга? Бекор гап. Баъзиларда бавосил деган шундай бир касаллик бўлади, холос”.

Қўп ўтмай, совет педагогига номуносиб хулқ-атвори учун (дуркунроқ ўкувчи қизларга мумаласи бошқача эди) Нуриллаев мактабимиздан четлаштирилди. Айтишларига қараганда, у тоғдаги илм ўчоқларидан бирига ўтказилган эмиш. Ҳайвонот оламига яқинроқ-да...

– Қани, қолганини эшитайлик, Ўрмонбой! – деб қолади кимдир.

Ўрмон калтага жон киради.

– ...бизнинг тоғлардан оқиб келадиган зилол сувларимизни тортиб олиб, булгаб ётгани етмагандек, – дея завқшавқ билан қайта ўқимоққа тушади у, – яна бир номардликка қўл урди. Эшитган чиқарсиз, жийдалиликлар ўта талантли, санъатсевар, ўзи ҳам санъаткор халқ. Ана шуни-сини кўролмаган ҳасадгўй қўшдарёликлар бизни ўз туманига қўшиб олишга эришди. Биз, жонажон Жийдали ахли бундан мутлақо норозимиз! Агар Сиз ушбу масалани ижо-

бий ҳал қилиб бермасангиз, БМТга ҳам ёзишга тайёр бўлиб турибмиз!

Шикоятномасини ўқиб тугатгач, Ўрмон калта “қалай, қотирибманми?” деган каби мақтов кутиб атрофга аланглайди. Мақтов ўрнига, оғзини ланг очиб унга қулоқ тутган “ўта талантли, санъаткор ҳалқ” вакилларидан бири шундай савол сўрайди:

– Ну, БМТ дегани Москвадан ҳам нарида экан-да, а?

– Нари, Набибой! – дейди энсаси қотиб Ўрмон калта. – Бобонгизнинг гўридан ҳам нари!

– Сиз кетини тиндирмай аризани ёзяпсиз, Ўрмон ака, биз ҳам эринмай қўйни қўйиб беряпмиз, – дея сўз қотади яна бир оми, – Кал подшо ўзбекчани тушунмайди-ку!

Ўрмон калта бошига мусибат тушган кишидек надомат билан уҳ тортади.

– Ўзбекча тугул чулчутчаниям билади у, мусулмон! Э, у ёғи билан ишингиз бўлмасин, иним. Керак бўлса, унинг ёнида мингта тилмоч!

Мунозараю музокарага аралашмай доим бир четда жимгина кулимсираб ўтирадиган, аслида балодан ҳам бохабар писмиқ муаллим Раҳмон Болта шу гапдан кейин чопонининг барини қоқа-қоқа аста туриб уйига жўнайди. Ҳовлиси беш қадам жойда.

Писмиқнинг бу қилигини негадир ўзига таъна-ҳақорат деб билган Ўрмон калта бирдан ловуллаб кетади:

– Агар келаси йилга қолмай Жийдалини ажратиб олмасам!..

– Қасам ичмай гапиринг, Ўрмонбой! Хўш, нима қиласиз?

– Ажратиб олмасам – кўчиб кетганим бўлсин бу ердан!

– Ҳай-ҳай, кўйинг. Қаёққа ҳам бораардингиз, ошнам!

– Кўшдарёга кетади-да, Кўшдарёга! – дейди кимдир шафқатсизларча ҳазил қилиб.

– Ундан кўра қўшмозор маъқул менга! – Ўрмон калта ҳеч кутилмаганда бўшашиб зинадан тушадию, боши алланечук ҳам, сира ўзига ўхшамай мачит-магазиндан узоклашади.

Жийдалининг шони ҳам, шарафи ҳам, унинг қайтадан тикланиб, мустақил бўлиши ҳам гўё фақат шу одамга керак! Ўзини ўзи билмайдиган, бир қарашда девонасифат,

ўлгудек күйди-пишди шу жонга! Туман тугатилганидан бери бу шўрликда тиним йўқ, кўлтигида бир даста аризаю шикоятнома, уйма-уй изғигани изғиган. “Отанг пахтадан келдими? Энангни чақир бўлмаса! Сен ҳали гўдак, имзонг ўтмайди”. Сув келтирган хору зор деганларидек, ҳув бирда “Маданиятдан четда қолиб кетдик-ку, деб юқорига ёзган мана биз-да!” дея яқинда қишлоқда томоша кўрсатиб кетган кўчма зоопаркнинг “савоби”ни ўзиники қилмоқчи бўлиб керилганида мачит-магазин аҳлидан ба-лога қолгани-чи! “Маданият эмиш! Ўша келиб кетгандан бери бола-бақра увиллаб, чийиллаб, ўкириб, вишиллаб безор қилди-ку! Маймунларнинг ҳув қилифини эшитган-дирсиз, Ўрмонбой?!” “Аждодларимиз-да, – деди мухбир ҳам бўш келмай, – сиз билан бизнинг эсимиздан чиқаёзган нарсаларни эсга солиб кетди!”

* * *

Дарвоқе, зоопарк, ҳайвонот боғи! Дунёнинг паққос эсидан чиқкан ташландик (Ўрмон калта эшитмасин!) қишлоғимизга бир вақт ана шунинг кўчма бир хили келиб қолди-ку! Уни ёза-ёз қилиб ростдан ҳам Ўрмон калта олиб келдими ё бошқа бирор юбордими, нима мақсадда – анигини ҳеч ким билмайди. Э, бунисининг нима қизифи бор? Муҳими – бўрию тулки, маймуну йўлбарс “отар”га келгани. Ана томоша, мана томоша! Боз устига денг – тептекин! Бир ҳафта эртаю кеч марказдаги чорбоғ-чойхона ёнбошида ҳайвонот олами вакилларининг намойиши бўлди. Ишқибоз бола-бақра эртаю кеч бўрига ўхшаб увлайди, йўлбарсу шерга тақлидан наъра тортган бўлади, турли-туман паррандаларга жўр бўлиб чий-чий қиласи – хуллас, одамзоту ҳайвонот кўшилиб-аралашиб кетди деяверинг!

Сайёр зоопарк чорбоғ ёнидан ўтган Совет кўчаси бўйлаб макон курган эди. Кета-кетгунча турли катталикдаги қафасу қафасчалар. Ажаб томоша. Ҳамманинг димоги чоғ. Эрмак-да. Бўлмаса-ку, анови тоғ-тош орасида бўрию тулки беҳисоб; қишлоқнинг ўзида ҳам икки оёклиси етарли. Лекин Дагар овчидан бошқа ким бориб уларни кўрибида?

Хавфли, хатарли. Бу ерда эса барчаси күз олдингизда, тай-ерп. Кўркув, таваккалга ҳожат йўқ.

Факат Додо сомсапаз билан Бегам кабобпаз бу томошадан норози, жигибийрон эди. Уларнинг бозори касод бўлди. Ҳаммаёқ сасиб-бижгиб кетган; монгур босган сомсаю кабобга ким қарайди?!

– Қачон даф бўлади бу энағарлар?! – деб дод солади Додо сомсапаз.

– Кетсанг кет, биқинингдан дарча очаман-а! – дея қўлидаги сих билан бехавотирроқ бирор қафасга ўзича ҳамла қилиб қўяди Бегам кабобпаз.

Мактабга биз шу йўлдан қатнаймиз. Дарсдан қайтишда ҳар куни бу ерда соатлаб текин томоша.

Бир гал кети қизил икки маймун дабдурустдан анови ишни бошлаб қолди-ку! Куппа-кундузи, атрофда кўз бор ҳам демайди-я! Урғочиси тўнқайиб ётибди, нари лабларини ялай-ялай томошабинларга тиржайиб силтанишини қўймайди.

– Одам боласи қоронғида қиласидиган ишни булар кундузи бажарар экан-а! – деди орқароқда турган кимдир.

– Ҳа, шунинг учун ҳам маймун-да, – деб қўйди шериги.

– Одамингиз ҳам гоҳида шундай маймунликка боради, ҳи-ҳи.

Битта-яримта хаёлироқ хотин-халаж “Иби, бетинг курсин!” дея рўмолини юзига тортиб четга чиққан бўлди. Безроқлари бу манзарадан кўнгил узолмай, рўмолини қайта ўраш баҳона, қараб-қараб олади: “Вуй-й, бешармлар!” Кечаги кунда кўп раҳбарларга хотин бўлиб чиққан “женсовет опа” – Маъмура гажак кўзини лўқ қилиб турди-турди-да, обдон хузурини олгач, холосасини баралла ошкор этди:

– Безабразия!

– Ҳа апа, эсга тушиб кетдими? – деди ширакайфроқ киномеханик Сайфи пасон бетамизлик билан.

Маъмура гажак ашаддий оилабузарни кўргандек нафрат аралаш унга қараб чийиллади:

– Суволич!

Кўлтиғида ўзидек семиз папка, мудом уйқусираф юрадиган Ламарк лақабли биология муаллимимиз ҳам

шу ерда эди. Бу одамнинг қовоғи очилганини шунда кўрдик.

– Қаранг, қаранг, Назаров, – деди у ёнида турган тарих ўқитувчисига илжайиб. – Турлар назариясини биларсиз? Фарқимиз кам-а?

– Энгельс бобонгиз ҳам бир нарсани билмасдан айтманда, домла! – деди тарихчи аждодларининг қилиғини завқ билан томоша қиласкан. Шунда у ер-бу ердан мўралаб турган биз, ўқувчиларга кўзи тушдию ўшқириб берди: – Йўқол-э, ҳайвон! Ҳе, уятсизлар!

Шу воқеа сабаб бўлдими, бошқами, ҳарнечук, бир ҳафта мобайнида ёшу қарига эрмак-овунчоқ бўлган кўчма зоопарк эртасигаёқ қишлоқдан кўчини кўтарди. Айтишларича, Додо сомсапаз билан Бегам кабобпаз бир кун эртадан кечгача мижозларини текин меҳмон қиласкан. “Лекин бир грамм ҳам қуйиб бермади-я, энагарлар!” дебди кимдир норози бўлиб.

Қишлоққа зоопарк келиб кетдию бир ҳақиқат аён бўлди-қолди: Мўмин кал деганимиз айнан маймунга ўхшар экан! Узун-узун қўллари тиззасига тушиб туриши ҳам, афтбашарасининг ушоқлигию кўзларининг битдек думалоқлиги ҳам, бароқ кошидан бир эн юкори – пешонасининг қоқ ўртасидан бошлаб ўсган соч паҳмоқ жунга айланниб тамоми жойини босиб кетганигача – маймуннинг ўзгинаси! Нега илгари ҳеч ким пайқамаган экан буни? Қафасдаги маймунларни кўрган борки, “Вуй, Мўмин кал эмасми анови?!?” дерди бир овоздан. Ўша “отарчи” маймунларга тикилавериб, уларга ўхшаб қолдимикан ё?

Тавба, маймунга ўхшамоқ, маймун бўлмоқ унга гўёки завқ ҳам бағишларди. Шўх-шалайим Махмуд “Қани, Мўминбой, бир маймун бўлиб беринг-чи, кўрайлик!” деса, шу заҳоти жон-дили билан баайни маймунга айланарди-қоларди: қип-қизил тилини айлантириб лабларини ялай бошлар, дум-думалоқ кўзларини ҳар ёнга тикиб бемаъно иршаяр, кўлларини чалмаштириб елкаларини қашимоққа тушар эди.

Кейинчалик билсак, унинг мучали ҳам ўзига мос экан: ҳамдуна – маймун!

Энгельс бобомиз бундай ажойиботлар хусусида ҳам бирон фикр билдирамаганмикан, Назаров муаллимдан сўраб кўрмоқ керак!

* * *

Мўмин калнинг маймун бўлиб қолганию Маймун аталиб кетгани ҳали ҳолва экан!

Жийдалини ўғри босди, жўралар, ўғри! Оддий ўғри эмас, сирли, аломат ўғри. Дунёнинг ҳеч бир жойида ҳали бунақаси учрамагандир. Эшитинглар бўлмаса!

Дастлаб, Сайфиддин Кулолнинг уйига кечаси ўғри тушибди, кўркувдан ҳанноснинг кўл-оёғи бирдан шол бўлиб қолганмиш, деган овоза тарқалганда ҳеч ким ажабланмади, ичи ҳам ачимади. Қайтага, ич-ичида хурсанд бўлганлар кўпроқ чиқар. Ажаб бўпти, хўб бўпти! Ўғри шуникига тушмай кимникига тушсин! Зўр ўғри экан, отасига раҳмат!

Кулолов ўн йиллардан ортиқ райпога раислик қилган, туман тарқаганидан кейин, мана, икки йил бўладики, сель-пога раис. Ўтда ёнмас, сувда чўқмас бир бало!

Ўғрилик тафсилотига ҳеч ким қизиқмади. “Оёқ-қўли ишламай қолгани”га қаноат ҳосил бўлгач, ўғрилик тафсилоти қолиб, гап Кулоловнинг ўғли Ҳасанчага ўтиб кетди.

Ҳасанча бизнинг синфдошимиз эди. Катталар унинг отасини қанча “яхши кўрса”, биз ҳам Ҳасанчага шундай эдик. Чунки у бизга ўхшаган эмас эди-да. Бошқача. Юриштуриши ҳам, кийиниши ҳам. Биринчи синфданоқ мактабга соат тақиб келган, тўртингчиларга борганда башанг велосипедига мошинанинг чамбарагини ўрнатиб, лекин шуни ҳам “кўйвориб” қизларга бодиларча ҳуштак чалиб юрар эди. “Битиб кетган” раиснинг арзандаси-да. Айниқса, ўтган қишдан буён у бамисоли қаҳрамонга айланган. Бирга ўқиб, ёнма-ён бирга юрган одамингиз тўсатдан олдинга ўтиб ном қозонса – кимга ёқибди, айтинг!

Қиши оёқлаган кезлари туман газетасида “Митти шофёр” деган очерк чиқиб, унинг ёнбошида мошина чамбарагига тармашган кўйи тиржайиб ўтирган Ҳасанчанинг

сурати ҳам босилган эди. Ҳамманинг оғзида – Ҳасанча, довондаги қорбўрон чоги унинг кўрсатган жасорати; туманда у Гагариндан кейинги машхур одамга айланган, ота-оналаримиз уни бизга ибрат қилган, бизлар хавас-ҳасаддан кўйиб ўлган!

Бебилиска шуҳратдан боши гангиб, бизга ўхшаганлар билан ўқишига ор қилдими, “митти шофёр”имиз саккизинчи синфни битириб-битирмай, вилоят марказидаги аллақайси техникумга кириб кетди.

Ҳасанчанинг жасорати ўша кезлар қайта-қайта муҳокама қилинган бўлса-да, кеча уйларида рўй берган ўғрилик баҳона, мачит-магазин аҳли уни бугун яна бир элакдан ўтказмоқда эди.

– Шеримардликни қаранг, ўзини шартта ғилдиракнинг остига ташлаган-а!

– Ўзини эмас, пальтосини! Бир пальто жалка бўптими унга – ота раис!

– Намунча? Мошина қорга ботган бўлса ботгандир, бир вақт чикиб кетарди-да, шунга пальто тўшаш шартмиди?

– Шарт эди, оғам! Мошина ботиб ётаверса, устидаги ун намикиб, хамирга айланади. Хамир ачиб-айниб, бутун Жийдалингиз очдан ўларди, билдингиз!

– Билдик, билдик. Лекин мактаб боласи ўқишини қўйиб қиши куни хув довонда нима қилиб юрибди? Ким унга рўлни берди?

– Мошина – сельпонники, Ҳасанча – сельпо раисининг ўғли! Яна саволдан борми?

– Ҳа-а, шундан келсангиз-чи! Газет ҳам шунинг учун мактаб ёзган денг?

– Ҳасанчани эмас, раисни мактагани бу! Ўрмон калта кажавали мотоциклдан умидвор бўлиб юрувди.

– Ололмади, ололмади. Ҳў даштдаги чўпонга пуллаб юборди энағар Кулолов!

Мухбирнинг ўзи бугун кўринмас, чамаси, шикоятномаларини қўлтиқлаб вилоят марказига кетган эди.

– Бурноғи йили чиллада Темир чопагоннинг кенжаси бир отар қўйни қутқараман деб кирдан учиб ўлган эди,

мурда бир хафта деганда сойлиқдан топилди – уни нимага ёзмади газетинг?!

- Ҳасанча-Ҳасанча деймиз, Ҳусанчасиям борми шунинг?
- Ҳусанча эмас, Зухрочаси бор. Бизга кўшни-ку, биламиз.
- Бор эди денг! Бултур кўшдарёлик бир шопир бола билан қочиб кетди, шундайми?
- Ҳасанчаси мошинанинг тагига ўзини ташлаб эмиқдошини опқолмабди-да?

Ичидан пишган Болта Раҳмон чопони этагини қоқа-қоқа ўрнидан қўзгаларкан, гурунгга якун ясагандек, учуриқ қиласди:

- У жамоат мулки эмас-да!
- Гап Ҳасанчага чалғиб, асосий муддао ҳамманинг ёдидан кўтарилий дебди. Сайфиддин Кулолникига ўғри тушишга тушибди, хўш, нимасини ўмарид, нимасини шилиб кетибди – шуниси қизиқ-да!

Шуниси қизиқки, ҳеч нарсага тегмабди, ҳеч нарса олмабди! Қанақа ўғри экан у?! Қасд қилиб бировникига тушдингми, бирор балосини кўтаргин-да, номард! Сайфиддин Кулолнинг ҳаммаёги тўлиб кетган, кўл чўзмасанг ҳам нимадир ўзи оёгингта илашади-ку, ахир!

Йўқ, кўркитганмиш, холос. Хотини катта қизиникида экан, Ҳасанча шаҳарда юрибди, Зухроси кўшдарёлик шопирнинг қўйнида – бойбобо уйда ёлғиз, ҳовлидаги чорпоясида мудраб ётган экан. Айвонда шитир-шитир товуш эшитилиб, бошини бундай кўтариб қараса – хосхонадан лип этиб чиқкан аллақандай шарпа икки ҳатлаб кўздан фойиб бўлибди. Холбуки, айвон пештоқида чироқ ҳам ёниб турган экан. Мол аччиғи – жон аччиғи, югарасолиб хосхонасига кирибдию тўрдаги сандиқни қучоқлаб сулайиб қолибди. Эрталаб хотини келганда ҳам шу ахволда сандикка осилиб ётган эмиш.

Бекор гап! Бу замонда ўғри нима қиласди? Кирса ҳам пайт пойлаб, уйда ҳеч ким йўклигига киради-да. Бекор гап, шунчаки кўзига кўрингандир, холос. Ўзи мол-дунёси кўпайган сари одамзод ана шундай кўрқоқ, восвос бўлиб боради.

Лекин қанақа аҳмок, анойи ўғри экан-а у?

* * *

Ўгри тушса битта хонадонга тушади ёки навбати билан қилади бу ишни, тўғрими? Ўша кеча Жийдалининг бирваракай тўртала тарафида кий-чув, шовқин-сурон турди: ҳайхуй, ушла-ушла, қўйма-қўйма, югур, чоп!

Бу ҳол кейин ҳар кеча такрорланадиган бўлди. Ҳаммаёқда ваҳима, кўринганнинг оғзида шу гап: бизниги ҳам келди, ўз кўзим билан кўрдим; йўқ, биз томонлар тинч, кўшни маҳаллага бир оралаганмиш деб эшидик; асосан эркаги йўқ хонадонларни кўзлаб келармиш; хўп, келиб нима қиласмиш – ҳеч нима, шунчаки кўрқитиб, ҳазиллашиб кетармиш, холос; қизик ўғрилар экан-а!..

Ҳақиқатан ҳам ғалати ўғрилар эди. Аслида, ўғри демаса ҳам бўларди уларни. Ўғри бўлса ҳам зинхор безарар, айтиш мумкинки, ижобийроқ ўғри эди. Қозоннинг қопқоғини тескари ёпиб кетадими-ей, олмани қоқишига қоқиб, бир жойга тўплаб кетадими-ей, қовунни азза-базза сўйиб, аммо бир тилим ҳам емай кетадими-ей; кимнидир устидаги кўрпасини тортиб-тортиб уйфотади, усти очиқ қолганникини эса ёпиб кўяди; бировининг томидан ҳовлисига шириллатиб пешоб қилганмиш, эрталаб туриб қарасалар – заранг ер худди теша уриб юмшатилгандек шудгор бўлиб ётганмиш!

Кишлок аҳли ҳар эрта салом-алик ўрнига бир-биридан “суюнчи олади”: кеча бизницида... ўтган куни ҳамсояницида... аzonда туриб бундай қарасам...

Бошқа нима қилсин? Жийдалининг олди эркаги тириклик измида ҳар ёкка даф бўлган, қишлокда нуқул ўзидан қолган қари-қури ё майиб-нотавон, хотин-халажу ёш бола! Буларнинг кўлидан нима келарди?

Аксига денг, ўғри ўлгур худди ана шундай аёлмандроқ хонадонларга “салом бермок”ка ишқибоз эди. Қоронги тушаверса, ваҳима ичида ҳамма уй-уйига кириб кетади. Уйкуга ётганда ҳам бировининг қўлида узун гаврон, бошқа бировининг тўшагида паншаха; яна кимдир кунду-

зи ухлаб олиб, кейин тонггача мижжа қоқмай навбатчилик қилган; оналар йиғлоқи болаларини “ана, ўгри, ана!” дея қўркитган!

Хуллас, Жийдали таҳлика қўйнида эди. Анови, давлатнинг бир жуфт вакили эса ўзи билан ўзи. Милиса тоға чала ўқланган тўппончасига бошини қўйиб аввали окшомдаёқ қотиб қолади, милиса жиян ёнидаги пахтабанд ғилофни пайпаслай-пайпаслай уйига шошади: хотин-боласи хали ёш!

Бир кечада маҳалла бўйлаб Соли бақироқнинг ғолибона ҳайкириғи янгради:

– Ҳаҳ, энағар, қўлимга тушар экансан!

Эй яшанг-э, Соли амаки, бор экансиз-ку!

Маҳалламизнинг тириги шу. Ўзиям девдек келади, норғул, бақувват. Кунинг битди, ўғривой! Жийдали, зафар ноғорасини чалаверсанг бўлади!

Аммо зум ўтмай теварак-атроф жимжит бўлиб қолди.

Тафсилотини эртаси куни мачит-магазиндаги муҳокама чоғи эшидик.

– Гарданига шундай чангол согланимни биламан, пирт этиб қўлимдан сугурилиб кетди-я, уккағар! – дея маҳоват қиласиди Соли бақироқ. – Ўзиям ажинами-алвастига ўҳшаган бир тоифа, ҳаммаёғи жун!

– Ҳа-ҳа, тўғри, – деди кимдир уни қувватлаб, – маймунга ўхшайди, хув анови келган маймунларга!

– Ё ўшалардан уч-тўрттаси қолиб кетганмикан-а? – деб авомларча тусмол қиласиди бир оми.

– Ўзи бор-йўқ келгани тўртта эди-ку, Ҳамробой!

– Боз бир ҳамла қилдим-у, йўқ, бўлмади, – дея бесабрлик билан сўзини давом эттирди гурунг қаҳрамони. – Бир ҳатлаб девордан ошди-кетди. Уч пахсалик девордан-а! Эгам бечора бир ой уриниб зўрга тиклаган эди, ўшандан. Ё пирим-эй! Оёғида пружинадай бир балосиям борга ўҳшадиёв, фиж-фиж этиб кетди-я. Бўлмаса, ундан девордан қандай сакрайсан! Ҳаҳ энағар, энди қўлимга тушсанг!..

– Мумкин, – деди урушдан кейин ҳам талай йил ўша ёқларда юриб келган Исломил телпакдўз гапга аралаб. – Разведкачилар яширин машқ ўтказаётган бўлиши мумкин.

Бу гап қўпчиликка янгилик туюлиб, ҳамма бирдан сергак тортиди.

– Разведкачилар?! – деди гангиб Ражаб қора. – Ҳаммани ваҳимага солиб, бесаранжом қилиб-а? Нега олдиндан бизга маълум қилинмайди?

Телпакдўз мийифида кулимсиради:

– Нимага сизга маълум қилиши керак? Унда нимаси разведка бўлади бунинг?!

– Қизик, келиб-келиб Жийдалида қиласидими машқини? Нима, биз ердан чиққанмизми? Разведка қилмоқчи экан, аборсин Кўшдарёсига!

– Бу ер қулайроқ топилгандир-да, тоғли жой.

– Ташландик жой, халқи ҳам ташландик десангиз-чи! – деб қолди қаёқдандир пайдо бўлган Ўрмон калта. – Ёзамиз!

Хеч кимдан садо чиқмади. Ўртага узоқ жимлик чўкди.

– Солибой, – деди бир маҳал Исмат деган чопонли, – шу, бўйнидан гижимлаганингизда бирор сўз демадими мабодо?

– Оёғидаги пойабзали гиж-гиж этганга ўхшади, тамом.

– Қизик, бизникига келганда худди гапиргандай, “Гули-гули” дегандай бўлди-я! Билмадим, бу нима дегани экан.

– Қулоғингизга шундай чалингандир-да, Исматбой?

– Йўқ, аниқ-тиниқ эшийтдим: гули-гули!

– Кўнглингизга келмасин-у, балки уйдаги заифалардан бирортасининг оти...

– Аввалосига, бизда “гул-пул” йўқ, aka, бари – Ҳалима-Салима! – деди Исмат орланиб ва қизишиб. – Бўлганда ҳам... ҳамманинида бўлмас. Мана, Ҳамробойнинида ҳам шундай деганиши. Тўғрими?

– Шундай, шундай, – деб қўйди Ҳамробой.

– Гули-гули? Ўзбекча сўзга ўхшайди-ку, – деди Аҳад маҳсум. – Разведкачилар ўзбек бўларканми!

Эгнида гимнастёрка, яқинда ҳарбий хизматдан қайтган бир йигит маҳмаданагарчилик қилиб қолди:

– Балки “х” билан айтгандир? Ўрисчасига бу...

– Бўлди, бўлди, укам, билдик. Биз ҳам сиз кийган этикдан кийганмиз! – деди Соли бақироқ.

Боядан бери мунозарага аралашмай, папкасидан “стол” ясаб бир четда алланимани ёзиб турган Ўрмон калта, ниҳоят, ўртага чиқади.

– Москва, Кремль, КПСС Марказий Комитетининг биринчи секретари, Жийдали ахлининг яқин дўсти, хурматли ўртоқ Никита Сер...

– Охиридан келаверинг, Ўрмонбой, бу ёгини биламиз! – дейди Соли бақироқ бетоқатлик билан.

Мухбир заррача оғринмай, пинак ҳам бузмай охирига ўтади:

– ...қўшиб олгани етмагандек, бошимизга ўғри, айгоқчиларини юборди...

Тош кўчада тўриқнинг туёқ товуши ва завқ билан кишнагани эшитилади. Шўро бобомиз! Бу манзилда бир дам тўхтаб, “ёвни барбод айлагач, ундан сўғин ватанига қайтмоқчи”.

Шу кундан бошлаб Жийдали “гули-гули”га тўлиб кетди. Салом-алик ўрнига ҳам – “гули-гули”, хайр-хўшнинг ўрнига ҳам – “гули-гули”. Ёшу қари баробар!

* * *

Жийдалига сирли ўғри оралаган ўша саратон кунлари кўп антиқа воқеалар бирдан қаторлашиб келган эди.

Гапни ўзимдан бошласам – мушукдан кўрқишим Олма келинга ошкор бўлди; Маймунни маймунлик устида кўлга туширдим; Шоир иккаламиз илк севгимиздан айрилдик; Мусаллам кокилдор келгинди чилдирмачи билан қочиб кетди; Эгам бечора бир думалаб Эгамбойга айланди.

Бу савдолар айнан ўша ёзда содир бўлганига, рости, ўзимнинг ҳам шубҳам бор. Эҳтимол, сал олдинроқдир ёки сал кейинроқдир, лекин содир бўлгани аниқ!

Шулар ичida бирдан-бир қувончли, ижобий дегулик воқеа – Эгам бечоранинг Эгамбой бўлгани.

Эгам бечора қишлоқдаги энг бечора одам эди. Маҳмуд жўрамизнинг одамларни тоифалаш тартибига кўра – энг охириги ўриндаги кимса. Шу кимса бир кечада кимсан – Эгамбойга айланди. (Кейин яна бечора бўлиб қолгани энди бошқа масала.) Воқеан, кечаси эмас, кундузи, аникроғи –

кечкүрун, хориб-чарчаб уйга келганида. Зина кассир маошига қўшиб мажбуран тутқазган ўттиз тийинлик лотереяга “Волга” ютди у!

Қишлоқда ҳамма бир-бирини танийди, Эгам бечора ни эса уч-тўрт қариндошию қўшниларидан бўлак ҳеч ким билмайди. У оддий бир пахсакаш, қурилишда ишлайди. Келгинди ғарибга ўхшаган анчайин бечораҳол: бир уй, бир даҳлизи, ташқарида икки гиламча ерию лойсупаси ва учтўрт туп олмаси бор, холос.

Ия, шу уйда унинг яна бир олмаси бор, юзлари қипкизил, шўхгина, истаралигина – Олма келин. (Асл исми бошқа, юз-кўзига ҳавас қилиб бу номни унга менинг энам қўйган.) Тағин икки олмача – қизалоқ ҳам шуники.

Кизи тенги нақшин олманинг бу қоқ ўртасидан бўлинган гўладек пачақ, пак-пакана кимсага нима дард билан теккани – кўяверинг энди, бошқа тарих, ўзи, ўзлари биладиган тарих; бизнинг бунга ишимиз йўқ.

Алқисса, ана шу одам бир думалаб “Волга”ли бўлди-қолди. Унака мошинани кўрган киши ҳам қишлоқда саноқли эди; машхур чўпондагина биттаси бор.

Бироқ арзанда “Волга” Эгам бечоранинг остонасини кўрмади (мошина сифадиган дарвозаси ҳам йўқ эди унинг) – тўппа-тўғри Қодир каламушнинг ҳовлисига кириб борди.

Каламуш – сельпонинг омборчиси, омборида ҳамма нарса бор эди. “Волга”дан бошқа ҳар бало. Каламуш ҳам кўп, дейишарди. Лекин энг каттаси – ўзи.

Янги мошина дарвозасидан киришидан олдин Каламуш Эгам бечора билан ака-ука тутинди.

Бундай бўлди: бечорани омборчи аввал уйига чорлади, кўй сўйиб меҳмон қилди, “ака-укачилигимиздан нишона” дёя елкасига тўн ёпди. Суриштириб келса, қишлоқда деярли ҳамма бир-бирига қариндош чиқади. Аммо ҳарчанд урин-масинлар, Қодир каламуш билан Эгам бечорани боғламоқ иложи йўқ экан. Чунки бири асли тоғлик, бирининг таги даштдан. Шевалари ҳам келишмайди. Хўш, нима қилиш керак? Ҳеч нима! Эгам ука бўлди, Каламуш – ака. Ўзлари шуни хоҳлади, вассалом! Уканинг акага бирор нима совға килмоққа ҳаққи борми, ахир? Марҳамат, ҳар кимнинг шах-

сий иши, қаршилик йўқ. Шундок экан, ука – Эгам бечора aka – Қодир каламушга “Волга”сини тортиқ қилиб юборса нима бўпти, тўғрими?!

Умрида киройи иззат-икромни кўрмаган шўрлик Эгам (энди – Эгамбой!) aka-укачилик зиёфатида ўлгудек ичид олибди. Тун ярмидан оққандо Каламуш безор бўлиб, “Энди уйингизга ҳам борарсиз, Эгамбой?” деса, янги қориндан чиққан “ука” талтайиб “акаси“нинг бўйнига осилиб олганмиш: “Бир кеча акамнида ётсан – ётибман-да!” Ноилож супага жой қилиб беридилар.

Акали бўлгач, Эгам бечора Эгамбой атала кетди; бошида янги қалампирнусха дўппи, эгнида оҳорли костюм-шим, юз-кўзига ҳам истара битиб, кўча-кўйда ўзича савлат ясад юрмоққа одатланди. Эгам берган Эгамбой-да!

Бу ёқда Олмахонни кўрсангиз – нақд Шўро бобонинг собиқ келини Мусаллам кокилдор дейсиз! Соллана-соллана қадам ташларкан, худди ҳаммада баравар арази бордек чи-мирилиб, ияқчасини таманно билан тўлғаб-тўлғаб кўяди.

Шундок пўрим эр-хотинга тангу тор ҳовлида туриш ярашмас эди, албатта. Биз билан девор-дармиён бу каталак-ка кириб-чикишга ор қилиб қолишди чоги, салдан кейин қишлоқ этагидаги олмазордан кенг-мўлгина ҳовли сотиб олиб кўчиб кетишди. Улардан ҳам кўра бунга мен хурсанд эдим. Хайрият, анови димоғдор бойвуччани кўрмайман энди! Гап шундаки...

* * *

Бутун қишлоқни алғов-далғов қилиб ётган касофат ўгри негадир бизникига сира йўлай демасди. Укам иккаламиз кечалари навбатма-навбат пойлаб чиқамиз – қани, бирор нима тиқ этса ё шитир этса! Эртасига болалар йигилиб олиб, “кеча бизникида ундоқ бўлди, бундоқ бўлди” дея бир-бировидан “суюнчи” олса, сиз лом-мим деёлмай турасерасиз. Алам қилиб кетар экан баъзан!

Шундай кунларнинг бирида жўраларим билан тоғдан сомон ортиб келиб кечқурун айвонда шалпайиб ўтирсам, энам зорланиб қолди:

– Улим, шу кеча анови Олма келинниги ўтиб ётсангчи? Эри Кўшдарёга пахса ургани кетибди. Ёш нарса, кечаси кўрқаман, деяпти.

Уч-тўрт йиллик қўшни бўлсак-да, шу жувондан алланечук тортинардим: кўрганда қаттиқ тикилади одамга.

– Э-э, мушуги бор! – дея баҳона қилмоқчи бўлдим.

– Келинг, укажон, келаверинг. Мушукни оғилхонага камаб даф қиласман!

Карасам – девор кемтигидан Олма келиннинг ўзи илжайибгина турибди. Бошқа баҳона йўқ!

Коронги тушгач, бўйнимдан судрагандек ноилож кемтик ошиб бордим.

Менга олма тагидаги темир каравотга жой ҳозирлаб қўйган, ўзи қизчалари билан супада ётмоқчи экан.

Борасолиб каравотга чўзилдим. Роса ҷарчаган эканман, дарров кўзим илинибди.

Бир маҳал юмшоққина нимадир юзимга сўйкалаётган-дек бўлдию чўчиб уйғониб кетдим. Мушукми?! Бирор тезтез нафас олаётир. Атир хиди.

– Ҳеч кимга айтманг, ўлайжон, сизни би-ир яхши кўриб кетдим-да.

– Э, боринг-э! – дедим дағ-дағ титраб.

Туриб кетай десам, бориб энамга нима дейман? Ётаверсам, худди ҳали яна бир ходиса бўладигандек!

Кўрқанимдан тонггача мижжа қоқмай ётдим.

Тонггача оғилхонада мушук миёвлаб чиқди.

Шундан кейин Олма келин мени кўрганда худди тамом бегонадек совуқ назар ташлаб ўтадиган бўлди. Мен ҳам худди ўлгудек ёмон кўрганим мушук ҳозир афтиимга чанг соладиган каби безиллаб ундан қочардим.

Ҳа, айтгандай, худди ўша кеча анови “арзандалар” ниҳоят бизникига ҳам “қўниб ўтибди”. Укам ёлғизлик қилиб ухлаб қолган экан. Богимизнинг этагидаги нашватини қоқиб, бир жойгинага уйиб қўйишибди. Ҳаммаси бир-бир тишлаб чиқилган... Эртаси куни мақтангандек буни болаларга “дастурхон” қилган эдим, Маҳмуднинг энсаси қотди:

– Чепуха! Ўгри-пўғри эмас, Маймуннинг иши бу, ўзимизнинг Маймуннинг! Хув ановинда ‘Кеча сизларни

кига келди-я, бир балони роса шалдиратди!” деб ваҳима қилди қўшнилар. Кейин билсак, аммам кечаси ташқарига чиккан эканлар.

Тўғри, аммасининг кўзи ожиз, шунинг учун ҳовлиларида у ён-бу ёнга қаратиб симдан дор тортиб кўйилган – кампир ўшанга осилиб ўзи эркин бориб келаверади.

Маймун дегандай, бир кеча “Дайди” фильмини ўнинчими-ўн биринчими маротаба томоша қилиб, кинохонадан қайтаётсан, қўшни девордан аллақандай кўланка аста сирғалиб тушяпти. Юрагим орқамга тортиб кетди: Ўгри! Энди нима қилдим-а? Бақирсаммикан?

Овозим чиқар-чиқмас, у келиб шаппа даҳнимни чангallади.

– Гули-гули! Бировга айтсанг – ўлганинг! Олма егим келди-да, салага, олмаси зўр бунинг!

Ё пирим-эй, Маймун экан! Ўзимизнинг Маймун!

Адашмасам, ўша – Эгамбой эркалиқ қилиб “акажони”-нинг супасида ётиб қолган кеча эди бу.

* * *

Ўрмон калтанинг ёза-ёзи таъсиридами ё кимdir бир барака топкур раҳм қилиб, кечалари таҳлика ичида яшаётган Жийдали халқининг кўнглига чироқ ёқмоқчи бўлдими, ҳарқалай, торини елкасига мингаштириб чаладиган китоблик машҳур ҳофиз ўша кунлари адашиб қишлоғимизга келиб қолди денг! Марказдаги қулубда катта концерт бўлди. Ҳофиздан ҳам чилдирмачиси зўр экан, аломат қиликлар кўрсатди. Гоҳ у ёнга ташлаб, гоҳ бу ёнга ташлаб, гоҳи ер бағирлатиб уради дойрасини. Дам чалқанча солиб асбобни осмонга отади, дам юзтубан ётиб уни боши узра чирпирак қилиб ўйнатади.

Билмадик, қай нағма устида у чўлоқ чилдирмакашнинг кўзи бир тола сочга тушиб қолибди! Узундан-узун соч эмиш! Бир учи саҳнада бўлса, бир учи ҳув олдинги қаторларда. Шунда ахли Жийдалини ғафлатга кўмиб, не бир усул араплаш нағмагар уни ердан оладио чапдастлик билан билагига ўрайди. Созанда эмасми, моҳир, эвини топади.

Кейин, саҳна ортида ҳалиги соч толасини билагидан олиб ташлайин деса – сира олинмасмиш! Узу-ун, чирмаб-чирмашиб кетган. Жийдалида кўпларга дор бўлган аргамчи соchlар!

Шундай килиб, Мусаллам кокилдор оқсок чилдирмакашнинг билагига илашиб-чирмашиб Китобга кетди-қолди.

Нурмат мусофирилнинг узунсоch шу қизи Бозорбoshi маҳалламизнинг кўрку жамоли эди. Қошига ўsmани қалингина қўйиб, ибо билан ерга боқсанча соллана-соллана қўчамиздан ўтганда мачит-магазин ахли ҳар қандай мунозарани тўхтатиб, бирдан жимиб қолар, чамаси, барчанинг кўнглидан бир хил фикр кечар эди. Астағириуллоҳ, астағириуллоҳ! Икки ўрим йўғон соч толма белда тўлғона-тўлғона ер супуриб боради, қолгандари эса шунга ҳамоҳанг, бамисоли парвона... Мусаллам кокилдор!

Ана шу соchlарига ҳавас қилиб бултур уни Шўро бобомиз арзанда ўғли Амалбекка олиб берган эди. Шотаймас бола бу соchlарнинг қадрига етмадими ёки етса ҳам билагига маҳкам ўраб олмоққа чоғи келмадими, бир ойга бормай нозанин Мусаллам кокилдор отасиникига кетиб қолди.

Лекин ҳали ора узилмаган, недандир умид бор, бу ёғи энди Мусалламнинг кокилию Амалбекнинг билагига қараб қолган, шунгагина боғлиқ бўлиб турар эди.

Шумхабарни эшитган Шўро бобомизнинг оркаш кампири ўша куни болохонада бир жўраси билан аракҳўрлик килиб ўтирган ўғлини алам устида қарғаб беради:

– Ўл бу кунингдан, шарманда! Бир қулоч аркон олиб ўзингни оссанг-чи!

Сўнг бир муддат қўшниникида чалғиб, уйга қайтса – ранг-қути ўчган Амалбек гандираклаб бостиrmадан чиқиб келаётir.

– Узилиб кетди, эна! Бошқа аркон йўқми? – дермиш у йигламсираб.

“Ёвни барбод айлагач, ватанига қайтган” Шўро бобомиз дарвозахонага отини қантариб, ҳовлига кирса – гужум остидаги кўлча бўйида бир тўп хотин-халаж кампирини ўртага олибчувиллашиб турибди. Қўйма-қўйма, торта-торт.

– Кўйинг, ундей қилманг, айланай, – дея хотинлар у ёқка тортгани сари кампир кўлга интилгани интилган:

– Йўқ, йўқ, ўзимни ташлайман ҳозир, кўйиб юборинглар! Шарманда бўлдим, ҳамсояжонлар, шарманда! Шўро бобонгиз эшитса нима бўлади?

Бор гапни боя кўчадаёқ эшитган Шўро бобомиз бу манзарага бир нафас индамай қараб туради-да, кейин хотиржамгина изн беради:

– Майли, майли, кўйиб юборинглар, қани, нима қилар экан?

Кўрқиб кетган оркаш кампир жонҳолатда силтаниб чиқиб ўзини кўлга отади. Шалоп-шулуп, қий-чув.

Сув ичида кампир ваҳима аралаш бир-икки бор қўл тўлғайди-ю, сўнгра юз-кўзи ва кийим-боши шалаббо, кўлнинг ўртасида саросима билан серрайиб туриб қолади. Ярим белигача сувда!

Шўро бобомизнинг бу масхара ҳолга ори келади, бояги оғир-босиқлик эсидан чиқиб, кўлидаги қамчини ғазаб билан серпайди:

– Чик-э бу ёқка, энағар! Анови мочагарнинг энасини сувда ётган деб эшитиб эдим, энди қайноаси ҳам сувга тушган десинми эл!

(“Сувда ётган” дегани, Жийдалининг тушунчаси бўйича, кўп иснодли гап: ғар, бузуқи.)

Шунда энди бошқа бир ошнаси билан қарта ўйнаб ўтирган Амал тайтуб болохона деразасидан бошини чиқариб чинкирганмиш:

– Хў дада, оғзингизга қараб гапиринг! Кимнинг хотини сувда ётган экан?! Кимнинг энаси сувга тушибди?! Эна, эна! Оёғингизга эҳтиёт бўлинг, сувда шишанинг синиги бор!

Мусаллам кокилдор бир ҳафта деганда Китобдан қайтиб келди. Шивир-шивирга кўра, юртида чўлоқ чилдирмачининг хотини, тўрт боласи бор экан. Кокилдорнинг ўзи “Ўқишига кирмоқчи эдим, бўлмади” деб баҳона тўқиди. “Ўқишига августда борадими, Мусалламхон?” деб сўрайдиган мардум топилмади.

Лекин энди ҳаммага аён эди: Жийдалининг жайдари ҳавосидан безор бу мусофириларниң қизи, қочиб ўрганган кўнгил, шу кокиллару шу қадди-қомат билан бу ерларда ортиқ туролмас-ов, бир кун бўлмаса бир кун барибир қайгадир кетиб қолмоғи бор!

* * *

Мачит-магазиндаги ўша кунги машварат катта момоси ҳам “сувда ётган” Мусаллам кокилдорнинг гўрига ғишиш қалаш билан бошланиб, гап “эркакка ўхшаган” Амалбекка ўтди; сўнгра асли палаги тоза Жийдалида нечук кейинги йилларда бундайин айниш-бузилишлар урчиб кетаётгани тафтиш қилинди ва ниҳоят ҳамма бало “мана шу ичиб ўтирган сувимиз”га келиб тақалди.

– Дарёнинг суви тошдан-тошга урилиб, пишиб келади. Бизники бўлса... Буниям таъсири бордир, – дея ўзича тусмоллади Аҳад маҳсум.

– Ё ҳукумат шунинг учун бизни, ўзимизга билдирамасдан, Кўшдарёга қўшиб юбордимикан? – деган яна бир тахмин бўлди Ражаб қора томонидан. – Ҳукумат ҳамма гапни айтмайди-ку. Шундай, айтмасдан қиласди доим.

– Тўғри, уларнинг суви яхши. Оқар сув-да, ични қулдиратмайди, фором, – деди ўртанча қизи Кўшдарёга тушган Сафар носфурууш қувватлаб.

Соли бақироқнинг бу гапга аччиғи чиқди:

– Кўйсангиз-чи, Сафарқул, ота-бобонгиз мана шу сувдан ичиб ўтган-ку! Ё бугунга келиб у миянгизни айнитадиган бўлдими? Билиб олинг, сизники булок сувидан эмас, тамакининг жойига ҳар бало аралаштирилган кулдан, ҳа!

– Кўргондаранинг оғзидағи қулоқбошида бир-иккита нотаниш кимса кўринганмиш. Кон қидирадиган анови геологларга ўхшамас экан, – деб қолди чопонпўшлардан бирори. – Шу, сувга ҳам бир бало аралаштираётиди-ёв!

– Ким? Ким аралаштиради? – деб сўради шаштидан тушмай Соли бақироқ, худди қўйиб берса, хозирнинг ўзида бориб уларнинг бўйнига арқон солиб келадигандек хезланиб.

– Ким бўларди, ўшалар-да!

– Қанақа ўшалар?

– Ўшалар-да, биласиз-ку!

Ваҳоланки, “ўшалар” кимлигини Жийдалида кеча туғилган чақалоққача (!) ҳамма биларди.

– Тўғри айтасиз, ўша энагарларнинг иши бу! – деди Соли бақироқ ахийри тақдирга тан бергандек вишиллашдан босилиб.

Ана шундай, Жийдали осмонига бемаҳал булут чиқса ҳам шўринг кургур қўшдарёликлар айбдор!

(Бу гапларни эшитгач, айниб қолищдан қўрқиб мен учтўрт кун сув ўрнига яхна чой ичиб юрдим: зарари камроқ бўлар, айнисам – камроқ айнирман.)

– Намоз вақти бўпқолди чоғи, мен турдим, – деди Аҳад маҳсум жойидан қўзғалиб. – Соат нечча бўлди, Набибой?

Набибой соатига қаравшга улгурмади – Соли бақироқнинг тағин куфри ошган эди:

– Э, ўтилинг, маҳсум, Жийдалининг вақтига ишониб бўлармиди!

Ўша куни мачит-магазинда мажлис қарори ўқилмади. Чунки одатда уни ёзиб-ўқиб эшиттирадиган одам, маҳаллий ҳукумат вакиллари бўлмиш тоға-жиянга бўйин бермагач, туман милисаҳонасидан юборилган маҳсус команда томонидан “Ёзув-чиズувингни тўхтатасанми-йўқми, ифвогар?!” дея биқинига муштлана-муштлана Қўшдарёга олиб кетилган, билганларнинг айтишича, элтиб нон-сувсиз яккахонага қамаб қўйилган эди.

– Ўша ерда ҳам тинч ўтирмас у. Начайлик милисани қасдлаб юрарди ўзи.

– Начайлик милиса ҳам қасдлаб юрган экан-да, мана, элтиб тиқиб қўйди!

Раҳмон Болта чопонининг барини силкий-силкий ўрнидан туаркан, бу дийдиёларга хулоса ясади:

– Жийдалида битта тирик одам ўша эди!

– Кремлга қараб ёзган шунча хатимиз нима бўлади-я энди? – деб қўйди бечора чопонпўшлардан кимдир.

* * *

Бошқа жойларни билмадим-у, бизнинг Жийдалида ўша вақтлар “севги-муҳаббат”, “севиб қолибди” ёки “турмуш курибди” деган гаплар йўқ эди, эшиитмаганман. Чамаси, бу тушунчаларга фақат китобларда ёзиладиган нарса деб қараларди. Китобдаги сиру савдолар эса олис, аллақандай бошқача юртлардагина кечиши мумкинdir – зинҳор-базинҳор покдомон Жийдалида эмас! Тўпори Жийдалида, масалан, фалончи фалончи билан севишибди деса, севган ҳам, севилган ҳам худди айб бир иш қилгандек дувва қизариб кетарди. Бирор бирорвига “кўнгил кўйиб” ё “кўнгил бериб”, ҳа, борингки, бирор бирорвини “ёқтириб” ё “яхши кўриб” “хотин қилиши” ёки “эрга тегиши” – бу энди бўлак гап! Қарангки, шунақасига ҳам bemalol қўшақариб юра-верса бўларкан!

Менинг эслашимча, “севги-муҳаббат”ни Жийдалида биринчи бўлиб киномеханик Сайфи пасон чиқарган эди. “Экки баласи билан гулдай хотинини қўйиб” (элнинг гапи), унинг марказий кўчадаги “келгинидилар уйи”да турадиган лаби қизил Флюорани “севиб қолгани”, у билан “юриши”ни эшитиб бутун қишлоқ йўл пойлаган: қани, севги дегани қанақа бўлар экан?

Ўз кўзим билан кўрганман: ҳақиқатан ҳам, ошиқ-маъшук кўчанинг ўртасидан кўл ушлашиб ўтган. Ҳеч кимга киё боқмай, назар-писанд ҳам қилмай ўтгану кетган. Сайфи пасон осмонга қараб, Флюоранинг эса лаблари қип-қизил! “Кўриб қўйинглар, эй қишлоқилар, биз бир-биrimizни севамиз!” Шунда қўшнимиз Саттор мискарнинг “Оббо, баччагар-эй, худди бирор келиб тортиб оладигандай-а! – дегани эсимда. – Кўл ушлашмаса севгиси хисобланмас экан-да, а, ё пирим-эй!”

Тўғри, салга бормай Сайфи пасон “экки баласию гулдай хотини”нинг бағрига қайтди: райпода бугалтер бўлиб ишлайдиган Лаби қизил вилоятдан келган тафтишчи билан топишиб қолган эди.

Мактабимизда эса бу оташин туйгуни илк бор ошко-ра урфга кўшган азamat – мана шу ўзимизнинг Шоир! (У вақтларда ёш, ҳаваскор бир қаламкаш эди, албатта.) Унга қадар ҳам-ку болалар байт битилган пинҳона хатлар йўллаб, эвазига қизлар ҳошиялари мунчоқли, икки буржида иккита бош ҳарф (масалан, “Э” – “М”) кашталаңган жимжима рўмолчаларни ҳадя қайтариб туарди. Шоиримиз бўлса дан-галига ўтди – яшириб-нетиб юрмасдан севди-қўйди. Шоирда! Ҳайиқадиган ё уяладиган одами йўқ – отаси ёшлигида ўлиб кетган. Хўш, у кимга ошиқ бўлди денг? Келиб-келиб рус тили муаллимамизга – мафтункор Наталья Дмитриевна, Шоирнинг шахсий таъбирича эса, Наташа Ростовага!

Наташа Ростова деганимиз педбилим даргоҳини ўқиб битирар-битирмас, ўша замоннинг ажидудумларига кўра, буюк Пушкину буюк Толстой тилини ўргатгани олис Полтавасидан олис ўлкаларга “сургун” қилинган ўн саккиз-ўн тўқиз ёшлардаги бир навжувон эдикি, мактабга ишга келиши билан ўқитувчию ўқувчи унга бараварига ошики бекарор бўлиб қолди.

Турган гапки, барча шайдоларнинг ҳам кўнглида бир нималар ғимиirlаб юрар, аммо барининг дами ичидаги эди. Шоир бир зарб билан ана шуни юзага чиқариб юборди. Шоирда. Бошқалар шеър ёзмас, ёзганда ҳам шоир эмас эди. Наташа Ростовамиз эса шеър ўқиб ҷарчамайдиган бир назм шайдоси экан. Икки шайдо топишди-қолди!

Биз, бошқа шайдолар шанба кунларини зориқиб кутиш билангина кифояланмоққа мажбур эдик. Шанба оқшомлари мактабда бошланган рус тили ва адабиёти тўғараги машғулотлари кечаси бир маҳалгача кинотеатр бикинидаги чиптахона пештоқидан таралаётган чироқ ёғдусида давом этар, қизил пальточасининг ёқаларини кўтариб, икки учими бўйнида жуфтлаб ушлаган бошяланг Наташа Ростова кор зарраларига юзини тутган кўйи энтика-энтика, ўша вақтларда унча-мунча одам номини ҳам эшиитмаган Сергей Есенин шеърларидан ёд ўқиб берар эди бизга.

*Не жалею, не зову, не плачу,
Всё пройдёт, как с белых яблонь дым.*

Увяданья золотом охваченный,
Я не буду больше молодым...

Тушуниб-тушунмай кулоқ тутар эканмиз, биз шеърга, шеърнинг оҳангига эмас, уни ўқиётган дилбарнинг овозига, ёш қизчадек эрка қилиқларию бегубор завқига маҳлиё бўлиб турардик.

Қани денг энди ўша кунлар!

*Бари ўтар... лекин ҳеч қачон
Қайтиб келмас менинг ёшилигим...*

Ана кейин...

* * *

Университетнинг иккинчи курсида ўқиётиб қишки таътилда қишлоққа келганимизда бир кеча аллақайдан зиёфат еб қайтарканмиз, марказий кўча бўйидаги оқ бинолар – “келгиндилар уйи”га етганда Шоир дафъатан таққа тўхтайди.

– Бу ерда энди Наташа йўқ, – дейдию ҳиқиллаб йиглаб юборади. – Наташа йўқ энди бу ерда, жўра, мен уни севар эдим, билардинг.

Икковлоннинг ҳам кайфимиз баланд, кинотеатр чип-таксонаси ёнида, пастак соябон тагида қўлтиқлашиб, чай-қалишиб турибмиз. Бундайин кўзёшлару оҳ-воҳларни кўравериб “дийдаси қотиб” кетган қор зарралари ҳавода эринибгина, бепарво чарх уради; кўчанинг нариги бетида қаторлашган оқ бинолар гарду бод ичидা алланечук ғарифона мунгайиб кўзга ташланади. Буни қарангки, бултургина Наташа Ростова яшаган қари тут остидаги хона дезрасасида бугун ҳатто милт этган чирок йўқ!

Бултур айни шу кезлар Шоир – отасиз, камхарж талаба стипендиасидан орттириб югурга-югурга кўлга кирифтани – шеърларини Наташа Ростова энтикиб ўқийдиган Есениннинг мовий муқовали арзанда беш жилдлигини унга совға қилиб келган, бир кеч шуни кўтариб борса – хонада бемалол сигарет тутатиб, майкачан ҳолда жисмоний тарбиячи Орзиқулов ўтирган экан. Уй бекаси ўзини ҳарчанд сипо,

хушвақт тутишга уринмасин, хижолатда қолгани сезилиб турар, балиқ қовурмоқ баҳона, у тез-тез ошхонага чиқиб кетар экан. Музтарин бир вазиятга тушган Шоир сувюқмас Орзикулов билан “мактабда ўзимиз ўқитган устудентнинг муваффакияти учун” чор-ночор кадаҳ уриштириб, омихта спиртдан уч-тўрт қўл ичадиу масти бўлади-қолади. Сўнгра кечганлари ғира-шира ёдида. Эшик ёндорига суюниб турган Наташа Ростованинг паришон қиёфаси, қистовлари: “Ну иди, иди, потом поговорим”. Шоир бир вақт қараса – кўчадаги қари тут тагида корга беланиб ётибди. Аввал бошлаб ким кимни сўқди, ким кимни муштлади – эсида йўқ; эсида бори Ваҳшнийнг дағдағаси: “Жўна! ...борми сенга бу ерда!”

Бу гаплар менга паққос янгилик эди. Ўзига етгудек мағрур, бир қадар ҳаводор Шоиримиз илгари ўлақолса ички сирини бировга ошкор қилмаган. Айтганида ҳам ўзининг мағлуб, забун ҳолатда қолганини усталик билан четлаб ўтган. Бу гал айтади у, тап тортмай барини тўкиб солади.

Ошиқ кўнгил, шоир кўнгил, сармаст, армонли кўнгил – чидаёлмайди, дардини ёради-кўяди.

Аммо мен бу кечмишдан таажжуб-ҳаяжонга тушибми, хув ўзим билган, шу чоққача эслашга ҳам қўрқкан сирдан оғиз очмайман: бечора Шоирнинг дардига дард кўшиб нима қилдим! Қолаверса, у ўзимнинг ҳам бировга айтиб бўлмас сирим-ку!

...Худди ўша унутилмас ёз охирларида, ўқув йили бошлиниши арафасида мактабимиз таъмирланадиган бўлиб, майда-чуйда юмушларга юқори синф ўқувчилари ҳам жалб қилинган эди. Бориб у ер-бу ерни оҳаклаймиз, ул-булни бўяймиз, холос. Лекин асосий мақсад – нечундир юртидан эртароқ қайтган Наташа Ростованинг дийдори! Тахликали шу ёз ичи уни соғиниб қолганмиз-да.

Сарховузда болалар билан валақлашиб ўтириб, ўз-ўзидан синфхонамизни кўргим келди. Нимқоронғи йўлак бўйлаб яқинлашарканман, хона эшиги очилиб, бир қўлида челак, иккинчисида пол ювгич таёқ кўтарган олакўз жувон чиқди. Ёнимдан ўтаётib у менга ғалатироқ қараб қўйгани эсимда.

Эшикни тортдим-у, турган жойимда қотиб қолдим.

Аввалига “Ёқалашаётибдими булар?” деб ўйлабман...

Ёпіб қўйгани ҳам қўркиб кейин аста эшик орқасига ўтдим. Қалтис ҳодиса устидан чиқиб, нима қилмоққа хайрон, нуқул дағ-дағ титрайман денг!

Ичкарида ростдан ҳам бир бесаранжомлик, питир-питиру пичир-пичир.

– Ну пусти, пусти!

– Паставиши мне петёрку, а, Наташка?

– Вот дурак, нашёл время!

Наташа Ростова билан... Маймун!

Шу тобда негадир хув зоопаркда қулогимга чалинган гаплар ёдимга тушди: “Одам боласи қоронғида қиласидиган ишни булар кундузи бажаар экан-а!” “Ха, шунинг учун ҳам маймун-да”. “Одамингиз ҳам гоҳида шундай маймунликка боради...”

Маймун билан Наташа Ростова маймунлик қилмоқда!..

Сарховуз бўйига қандай қайтиб келганимни билмайман. Болалар ҳамон Маҳмуддинг оғзига кўз тиккан – у жўшиб, кўпиртириб кеча кўрган киносининг мазмунини айтиб берәётир: бола кейин бундай қиласи, қиз эса бундай. Ҳеч ким менга бурилиб қарамади.

Бир вақт лайлак мисол ҳаккалаб ичкаридан Маймун чиқиб келди. Кайфи чоғ!

– Гули-гули!

– Ҳе энангни!.. – дея дабдурустдан уни сўкиб юборибман.

– Нимага? – деди у хайрон бўлиб. – Менинг энам йўқ. Ҳе, салага!

Сапчиб туриб унга тармаша кетдим.

Маймун бўйнимдан гиппа бўғиб, қулоғимнинг остига мушт солиб юборди:

– Одно-о-о!

О-о-о-о-о! Ҳовуз бўйида тупроққа беланиб ётарканман, илк бор бу дунёнинг аччиқ ҳақиқатларидан бирига дуч келганимни англардим. Узумнинг яхшиси итнинг насибаси экан-да, а? Нега бундай?

Кейин-кейин шунга, яъники узумнинг яхшиси ҳар доим ҳам яхшига буюрмаслигига кўникар экан киши. Энди кўзни

ўйнатадиган бирор узум донасини учратганда ўша гап хаёллимга келади: қайси итнинг оғзин тушиб қолди экан бу? Мана, оёқ остида ётибди – човут урмай бурилиб кетадигани топилармикан энди?!

Шундан сўнг Наташа Ростовани кўрсам, безиллаб қочадиган бўлдим – қочар эдим-у, аммо кўргим келаверарди денг: ўша аламли оғриқни яна туйиш учун, кейин яна безиллаб қочиш учун!

Рус адабиёти тўгарагига қатнамай қўйдим. Наташа Ростованинг ўзи ҳам энди бошқа синфларда дарс ўтар, бизга кирмас эди.

Болалардан эшитдим: “бевафо” муаллимамиз қаердадир Маймунни бошқаларга ўрнак қилибми, мақтаб қолганмиш, “Он смелее всех вас!” деганмиш.

Улар мен билган гапдан бехабар эди-да. Мен у сирни ҳеч кимга, Шоирга ҳам айтмаганман.

Лекин қачонки ўша воқеани эсласам, таажжубдан бошим қотади: анови фаррош жувон нима қилиб юрувди у ерда? Нега менга бундай қаради? Нега ҳеч нима демай ўтди-кетди?

Буниси энди яна бир сир!

...Сал-пал ховуридан тушгач, Шоир дафъатан шеър ўқий бошлайди:

*Расмингга термилдим, ўйлар банд этди,
Эсладим сен билан ўтган бир дамни...
Оҳ, шунда билдимки, бебош илк севги
Бахтли ҳам, баҳтсиз ҳам қиласар одамни.*

– Ҳозир тўқидингми? – деб сўрайман ҳайрат билан. – Зўр! Расми бормиди сенда? – Бирдан уни кўргим келиб кетади.

– Йўқ, “Қайдасан, ўн олти ёшим?” номли достонимдан бу, – дейди Шоир; мақтанганини ҳам, камтарлик қилаётганини ҳам билиб бўлмайди. – Расми бор-ку. Виньеткада. Бошини чап ёнга солинтириб тушган.

Сўнг сармаст, дили вайрон Шоиримизнинг телба ховури яна қўзиб, “У яшаган хонани бир кўргим келяпти, юр, бо-

риб эшигини очиб кирамиз!” дея туриб олгани-чи! Шунда мен уни базўр судраб уйига элтиб қўйганман.

...Кейинроқ нималар бўлганини биз билан ўқишига кетмай қишлоқда яшаб қолган “Жийдалининг патриоти” – Маҳмуд жўрамиз орқали эшитиб билган эдик.

Ўшанда эрининг бежо юришларидан хабар топган хотин – Ваҳший Орзиқуловни дегани учун Шўро бобо оқ қилиб юборган шаддод Гулбиби бир кеча қўлида заранг гаврон билан келиб жазмандарни босади, уриб шўрлик Natasha Ростованинг эшик-деразасини майдалаб ташлайди.

Комсомолда суюги қотган Гулбиби қиз кошки шу билан-гина кифоя қилса!

Хуллас, бўйнида бўйинтуруқ, олис юртлардан Есенин шеъриятини тарғиб этгани келган, ўзи ҳам зебо бир ғазалдек ажиб санам бадном бўлиб, тумандан бадарга қилинади.

Қайда экан у ҳозир, биз – ўсмир кўнгилларни энтиктирган дилбар муаллим? Шоирга ўхшаб жар солмасдан, пинҳона бир ҳавас билан мен ҳам уни яхши кўрардим-да!

...Икки мажнуннинг илк севгиси шу тариқа, яъни одатдагидек бешараф-бешарофат якун топган экан-да, деб ўйлаётгандирсиз? Хато қиласиз, бу достоннинг баттар маҳзунроқ давоми ҳам бор эканки, уни менга кўп ийлардан кейин Шоир ўзи мароқ билан сўзлаб беради. Ҳа, мароқ билан! Чунки энди ёшлиқдаги ўша маъсум туйғулар ўлиб, эски жароҳатлар аллақачон битиб кетган-да.

Пушкиннинг “Полтава” достони яратилганининг нечадир йиллиги арафасида, анъанага кўра, “бепоён юртим”нинг ҳар жойидан ҳайқириб, кўкрагига муштлаб шеър ўқийдиган навқирон назмчилари Полтавага адабий гаштакка йигилади. Бу вақтга келиб хийла танилиб қолган Шоиримиз ҳам ўша сафда бор экан. Полтава дарагини эшитиб у ширин энтиқади, недир бир умид-илинжда қанот қоқиб жўнайди. Сафар олдидан эски дафтарларини титкилаб, ичидан бир қоғозча топади. Ҳув ўша масъуд есенинхонлик оқшомларида “қизил пальточали муаллима” ўз қўли билан ёзиб берган экан: “Опамнинг адреси. Кат-

та шоир бўлиб биз томонларга йўлинг тушганда ахтариб борарсан”. Буни қарангки, худди шундай бўлади. Пушкинхонлик бир ёқда қолади, ҳар куни кўчама-кўча юриб ёшликдаги муаллимасини қидиради Шоиримиз! Ниҳоят, шаҳар чеккасидаги ҳароброқ бир манзилга етиб, кўшкаватли ёғоч уйнинг иккинчи қаватига чиқиб боради. Эшикни очган қўскироқ хотин “Ия, ҳозиргина ёнингиздан ўтиб кетди-ку, наҳотки кўрмаган бўлсангиз? – дейди пешгирига қўлларини артаркан. – Ҳа, опа-сингил бирга турамиз. Йўқ, эр қилмади. Ўқитувчиликни ташлаган, почтада ишлайди. Вой, ҳозиргина чиқди-я! Югуринг, етасиз!” Аммо Шоиримиз шошмайди. У боя ёнидан ўтган аёлни кўрган. Аёл унга ғалатироқ тикилиб қарагани ҳам эсида. Шоир йўлни чап солиб тезроқ бу ердан даф бўлиш пайига тушади. Эҳтимол, тақдир зарбалари тасқарага айлантириб ташлаган анови шўрлик ҳам уни кўриб, таниганидан қочиб кетгандир?

“Ўзинг-чи, ўзинг ҳам бир ойнага қарасанг-чи, дейдиган мардум йўқ”, деб кулган ўшандা Шоир.

Шеър қандай пайдо бўлади дерсиз? Мана, сизга яна бир шеър, балки “Эскирган муҳаббат” аталгуси достон!

* * *

Қишлоқ бирдан тинчиб қолди. Ё ўғрилар чарчади, ё уларни гап-сўз қиласериб қишлоқ аҳлининг оғзи толди. Аҳён-аҳён кечалари у ер-бу ерда ҳай-хуй бўлиб тураг, аммо бу ўша ваҳималарнинг олис бир акс садоси эди, холос.

Ўғрига ўрганиб қолган эканми, ҳамма алланечук зерика бошлади. Одамни андак бесаранжом қилиб, қўрқитиб қочишларини айтмаса, унча зиёни йўқ ўғри эди.

“Шулар ўзи ростдан ҳам ўгримиди?” деган масала маҳсус мухокама қилинди мачит-магазинда. Биров у деди, бироров бу.

– Ўғри жонивор бирор нарсамизни ўғирламоги керак эди, бу баччагарлар хасимизга ҳам тегмади-ку! – деди кекса телпакдўз афсусланганнамо. – У эмас, бу эмас, разведкачи эди булар, мендан сўранглар! Мана, машқини ўтказиб бўлдию қопини кўтарди.

— Лекин, ака, күёвни баҳона қилиб чимилдиққа киргандар ҳам бўлди-ёв, — деди Аҳад маҳсум. — Анови энағар Маймунни бир-икки жойга оралади деб эшилдим. Одам-кушнинг боласи-да!

Бу тусмол гапга негадир ҳеч ким эътиroz билдиrmади, бирор уни маъқулламади ҳам. Чамаси, Маймундан бошқа ҳам ордона шудгорни оралаганлар бор, шу ерда ўтирганлар ичидан ҳам топилар эди.

Умумий ҳисоб-китобларга қараганда, энг катта зарап Сайфиддин Кулолнинг шол бўлиб қолгани экан. Униям Ҳасанчаси келиб шаҳарга олиб кетибди – даволатгани.

– Сандинини-чи, сандинини? – деб сўради чопондорлардан бири.

– Буни кечаси ўзингиз бир оралаб кўрганда биласиз! – деди ачитиб Соли бақироқ.

* * *

Ўқиш бошланар-бошланмас биз пахта теримига жўнадик.

Кўшдарёнинг хароб бир даласидамиз. Тагимизга похол тўшаб тужонада ётамиз. Кўлга илингудай бир оқлик йўқ. Раҳбаримиз – ҳар йилгидек – Ваҳший Орзиқулов. Кўли қичиб пайкалма-пайкал орқамиздан юргани юрган. Кимни уришини билмайди – Маймун бу йил пахтага келмаган. Мактабни ташлаб у Ўрин шопирга шогирд тушган, яъни “подмен”. “Қачонгача мен бу хўқизни бокаман, ишласин энди!” деганмиш язнаси – аммасининг эри. (Ўша замонда шу ҳам бир мартаба кўриниб, доим қорамойга беланиб юрадиган Маймун сингари “подмен” – халфаларга биз ҳавас билан қарадик.)

Белимизда хўл этак, эргадан кечгача изгиринда кўсак қидирамиз. Боши битлаб кетган бечора қизлар ўтган ёз ўғри босган ўша ташландиқ қишлоғимизни ҳам соғиниб зор-зор йиғлайди денг: “Жийдали, жон Жийдали, қачон етамиз сенга?”

Ана шундай осмон тунд, рутубатли кунларнинг бирида эрталабдан қаёққадир йўқолган Орзиқулов бир замон пайкал бошида пайдо бўлиб ҳайқирди:

– Терим тўхтатилсин! Кал кетди, энди пахта териш йўқ!

У оёқда туролмайдиган аҳволда маст эди; ўрисча сўқина-сўқина олдимизга келгач, бор гапни эшитиб билдик.

Кал подшо ишдан бўшатилиби, ўрнига гўркови – сер-соҷу серқош “подмен”и ўтириби. Энди ҳамма нарса зўр бўлармиш!

Орзикулов тортинмай-нетмай ўқувчиларнинг олдида бўралатиб сўкарди: кал, мат-патингни! Маккажўхори, сўта, сўтак!

“Бошда Кал подшонг ҳам шундай мақталган эди”, деди-лар отам кейин.

* * *

Келаси йили баҳорларга бориб жафокаш туманимиз қайта тикланадиган бўлди денг! Нихоят, адолат қарор топди. Маълум бўлишибича, туманинг тугатилиши аввало ўшандаги нобоп сиёsat оқибати, қолаверса, мўмайроқ мансаб илинжида бунга “ўзимиздан чиқкан балолар” ҳам бош қўшган экан.

Ана энди бу тантанаю шод-хуррамликни кўрсангиз! Бутун Жийдали улкан бир тўйхонага айланган! “Керак бўлса, районнингни мен тиклаганман!” дея, кўллари орқада, катта-катта қадамлар билан Ўрмон калта кўччанинг ўргасидан кунда беш марта у ёққа ўтади, беш марта бу ёққа. Махаллий қаҳрамон!

Ризқ-рўз илинжида кеча ҳар тарафга тўзғиб кетганлар қайтиб кела бошлиди. Жийдали яна гавжум, обод бўлиб қолди. Анови ўғри ҳангомалари ҳам энди кўпчиликнинг ёдидан кўтарилиган, ўшанда кечалари “кўрқиб” чиққан биттаяrimta хурракроқ жувонларгина эрлари билан уришган-аразлашган чоғларда уни эслаб-эслаб қўяр эди, холос.

Кўп ўтмай отам вилоят марказига ишга олиниб, бир-икки йил шаҳарда яшадик. Бу орада ўзим Тошкентта ўқишига жўнадим. Жийдалида кечган кейинги талай гаплардан хабарим йўқ. Унда-бунда келганимда эшитганларимдан қизиқроғи шуки, Мусаллам кокилдор, қочишга ўрганган кўнгил, бу гал бир дорбозга қўшилиб кетибди. Ҳозир унинг болалари ҳам дорбоз эмиш. Оналарининг хув ўша машхур соchlарини дор қилиб ўрганишгандир-да.

Бу сафар энди Шўро бобомизнинг орияти қўзиб, “ёвни барбод айлашга” зўр берибди-ю, “ватанига қайтишга” ултумрабди – кўп балоларни бошидан ўтказган кекса вужуд, йўлда отдан мункиб, жон таслим этибди.

Тайтув Амалбек қайтиб хотин қилмабди. Афтидан, куйдирмажон кокилдор бир тутам жоду сочи билан унинг нозикроқ жойини қаттиқ чандиб кетган.

“Мусалламхон кетиб тўғри килган ўшанда, – дейди энди чапани Маҳмуд. – Жийдалининг бир гавҳари эди у. Ўзига муносиб, боптароқ эгар босадигани топилмаган-да бу ердан. Биз эса унда ёш эдик, ҳай эсизгина!”

Узок йили бир таъзияда Олма янгани учратдим. Эри Эгамбой яна Эгам бечорага айланиб, талай йиллар бурун ўлиб кетганидан хабарим бор эди. Бир тўда фотиҳачи хотинлар билан дарвозадан чиқаётган экан, дарров танидим. Кўзлари ғилтиллаб колган, аммо нимасидир сира-сира ўзгармаган. Менга алланечук ёт бир назар ташлаб қўиди. Ўтиб кетаётиб эса аста ёндашиб, “Ҳалиям мушуқдан кўркасизми, укам?” деса бўладими дабдурустдан! Донг қотиб қолибман. Эски фар!

Ҳамма тинчиса тинчигандир, Ўрмон калта сира тек турмади. Туман саркотибининг устидан ёза-ёз қиласерид қамалди. У ёқдан кўп грузинни бошлаб келди. Ўшалар билан ошна тутиниди. Қайдандир Сталининг бир оёқли ҳайкалини топдида, янги оёқ ясатиб, ҳовлисининг ўртасига тиклаб қўиди. Сўнг, мамлакатда интизом қолмади деб, “халқлар дохийси”ни оқламоққа киришди. Удасидан чиқолмади, яна қамалди. Шундай қилиб юра-юра ўлиб кетди. Ҳайкал нима бўлди, билмайман. “Отам сенинг жабрингга қолди, энағар!” деб аракхўр ўғли уни уриб-майдалаб ташлаган дейишади.

Аммасининг соқов қизига тегишиб қўйиб Маймун ҳам қамалди. Соқов киз бир баҳона, унга тегишганидан бирор норози ҳам эмас – туғишган аммасининг қизи, почча ҳатто жон-жон деб турибди, бунинг устига ўзи туталтуталроқ; аслида, касофат Маймун бир жойда ичиб олиб, “Мени билмайсизлар, мен яширин разведкадаман, хуванови ўғрилар орасида мен ҳам бор эдим!” дея оғзин гуллаб қўйган эмиш.

Маймун кўп йиллардан сўнг эси киравли-чиқарли, савдойироқ бўлиб қайтади қишлоққа. Ўз-ўзидан бориб Кўргондарадаги яккатуг мозорни эгаллаб олади. “Шайх”. Қишин-ёзин ўша ерда. Айтмоқчи, уч-тўрт йил бурун у билан бир учрашган ҳам эдик.

“Эркак” деган фильмимизни суратга олгани жой қидириб юриб, дара ёнбағридаги бир тутамгина, аммо роса кўркам чорбоғ устидан чиқиб қолдик. Ёнбағирга яхлит, улкан бир дараҳтдек ёпишиб турган ўша гужумзору түфданазорга яқинлашарканмиз, дара бўйлаб ёввойи ҳайқириқ янгради:

– Гули-гули, гули-гули!

Тошдан тошга енгил сакраб бирор биз томон келмоқда.

Маймун! Эгнида унниқиброқ қолган йўл-йўл “телняшка”, бошида куя егандек гардиши тешик-тешик “сомбреро”, биппа-бинойи жинси шим ҳам кийиб олган – унинг нимдошлигию йиртиқ-ямоқлиги баттар замонавийлаштириб турибди касофатни. Қалпоғи остидан “қайнаб” чиққан қопкора жингалак соchlарию пўрим чаккасоқолини айтинг!

Яқин келгач, менга кўзи тушдию таққа жойида тўхтади; кейин бирор марта бурилиб қарамади, сўз ҳам қотмади – уч-тўрт оғиз “гаплашган” бўлса режиссёrimиз Юсуфжон билан гаплашди.

Юсуфжон бу кимсасиз тоғу тошда ногаҳон учраган ажабтовур зотга тамомила маҳлиё бўлиб қолган, бир у ёғидан ўтиб қарайди, бир бу ёғидан.

– Сиз шу ерда турасизми? – деб сўради у кўзлари ёниб.

– Гули-гули, – деди Маймун дароз қўлларини икки ёнга қанотдек ёйиб.

Юсуфжон бизга ўгирилди:

– Нима у – гули-гули?

– Э, бунинг пароли шундай, – деб кўйди Маҳмуд.

– Гули-гули, зўр-у! – деди Юсуфжон баттар завқ билан.

– Бу ерлар ҳаммаси сизникими?

– Гули-гули.

– Айланиб кўрса бўладими?

– Гули-гули, гули-гули.

Маймун шитоб изига бурилиб кета бошлади. Бизга қарай-қарай Юсуфжон унга эргашди.

Улар аввал чорбоғнинг тумшуғида дўмпайган якка сағана олдига чиқиб боришиди, кейин дараҳтзор оралаб этақдаги (чамаси, бир вақтлар геологлардан қолган, ҳозир Маймуннинг бошпанаси шекилли) ёлғиз кўнқайиб турган фидираксиз эски вагонча ёнига тушиб келишиди. Бир нафас унинг атрофида ғимирсиб, “гули-гули, гули-пули” қилишиди-да, сўнгра бизнинг олдимизга қайтишиди.

Кетаётганимизда Маймун қўқисдан менинг енгимдан тортиб, тамоми соппа-соғ овоз билан:

– Ўв, уч-тўрт сўм ташлаб кет, – деб қолди. – Мен бу ерда сувингни қўриқлаб ўтирибман, номард!

Олдинда бораётган Маҳмуд шартта бурилиб, орамизга тушди.

– Давай-давай, марш! – дея хийла қўполлик билан Маймунни итариб ташлаган бўлди.

Эшитиб келаётган экан чоғи, Юсуфжон чўнтағидан ни-мадир олдию сўқмоқ четидаги тошга бостириб қўйди.

Маймун икки ҳатлаб уни илди-да, қароргоҳига қараб шаталоқ отиб қочди.

– Бекор қилдингиз, Юсуфжон, бу энағарга ҳайф, – деди Маҳмуд.

Режиссёrimiz одатдагидек дарров қизиқиб қолиб, Маймунни суриштира кетди: ким, нима?

Мен Маҳмудга маъноли қараб қўйдим.

– Э, бир савдои-да, – деб, хайрият, гапни бошқа ёққа буриб юборди тезфаҳм Маҳмуд. Бўлмаса, Юсуфжон “Келинглар, шуни кино қиласиз!” деб туриб олиши ҳеч гап эмас!

Кўл бўйига тушиб борганимизда, Юсуфжон айланиб уни томоша қиласкан, Маҳмуд мени бир четга тортиди:

– Анови энағар сувсаганда ҳам, бошқа пайт ҳам шу ерга келармиш...

– Йўғ-э! Ким айтди?

– Кўрганлар бор, оғам! – дея гапга чек қўйди у.

Бу ёғини ҳам кеча келиб Маҳмуддан эшитдим.

Бундан уч ойлар бурун Кўтарма қишлоғидаги қабристондан тобут йўқолади. Бу ҳол ўша маҳаллалик бир кекса новвой қазо қилган куни маълум бўлади. Ҳамма ҳайрон. Ақл шошадиган ҳодиса! Ноилож қолган маҳалла аҳли шун-

да күшни Қизилча қабристонидан тобут “қарз” олмоққа мажбур бўлади.

Ёз охирларига келиб, йўқолган тобутнинг дараги чиқади. Қўргондарада молини ўтлатиб юрган бир чўпон ҳув яккамозор чорбог яқинида уни тасодифан кўриб қолади. Бўш дея хаёл қилиб беихтиёр қопқоғини кўтармоқчи бўлса – очилмасмиш! (Жийдалида шундай – тобут қопқоқли бўлади.) Ичидан сим билан маҳқам чандиб ташланган экан! Бир амаллаб очиб қараса – тамоми жойини мўй босиб кетган бир маҳлук, кийим-боши билан ётибди!

– Жаноза ўқилдими? – деб сўрадим Маҳмуддан.

– Тўғриси, борганим йўқ. Ўқилса ўқилгандир. Билмайман.

* * *

Бир пасқамликдаги хароб, эскича, аммо сердараҳт ҳовлидан чиқиб, дўнгга ўрлаймиз – мошинамиз ўша ерда қолган.

– Хотин-потин қилганмиди шу, Маҳмуд? – деб сўрайман.

– Э, ким ҳам тегарди унга! Лекин боласи кўп! Бундай бир разм солсангиз, ҳар кўчадан битталаб чиқиб келади. Қизик, бари тенгдошдай. Бир йилда бўлган-да. Маймунваччалар!

– Дарвин бўйкетинг-э!

– Уни-буни кўриб, баъзида ўша уккағар Дарвин ҳам ҳақмиди, деган хаёлларга боради одам.

...Қари беҳи остидаги лойсупада уч кишими-тўрт киши гоҳ мудраб, гоҳо бир-бирига эринчоқкина сўз қотиб ўтирибди. Қарангки, ҳув Соли бақирофимиз ҳам шу ерда экан. Кўзида кўшқат кўзойнак, овози ҳам писиллабгина қолган. Мени танимади. Маҳмуд айтганидан кейин жонланиб кетди:

– Яхши одатингиз бор-да, жиян. Каниқўлларга келганингизда ҳам худо раҳматли отангиз билан мана шундай таъзия-фотихаларга бориб юргич эдингиз, эсимда. Раҳмат. Ўзингизнинг элингиз, қарз-да бу.

– Ҳў-ӯ, ўғри келган йили бир кеча сизни кўрқитган экан-а, ука? – деб қолди яп-янги дўппи кийган ўртаяшар

киши менга қараб. – Ҳар сафар телевизордан чиққанингизда шуни эслаб куларди. Соғ вақтларидағи гап-да бу.

– Кимни айтяпсиз, Мардонкул? – деб сүради Соли бақироқ: қулоқ ҳам адo бўлган шекилли.

– Бу кишининг ошнаси, Маймун... э, Мўмин раҳматлини эслаяпмиз-да.

– Яна кириб чиқадиган жойларимиз бор эди, – деди Маҳмуд бесабрлик билан фотиҳага кафт очиб.

... – Маҳмуд, бояги хиргойи қилиб тўрда ёнбош ётган бобо ким эди? – деб сўрайман дўнг бошига етганимизда.

– Отаси-да, – дейди Маҳмуд беҳафсалагина. – Дўппи кийган – аммаваччаси.

– Кимнинг отаси? Маймуннинг отаси йўқ эди-ку. Отилиб кетган.

– Хўш-э! Тағин уч-тўрт йил кўринмаганингизда бизни-ям танимай қолар экансиз-да! Қамоқдан қайтиб келганига минг йил бўлди-ку! Келиб уйланди, учтами-тўртта бола қилди. Маймунга ўхшаган. Биттаси наркоман. Қолганлари у ёғи Корея, бу ёғи Россияларда ишлаб келиб, шишиб кетган. Ҳали қарамабсиз-да, боғнинг этак тарафидаги қора ойнали қўшқават қасрлар – шуларники!

Хозиргина таъзиясидан чиққанимиз Маймун тирилиб кепти деса, мен бу қадар ҳайратга тушмасдим.

– Ростданми?

– Маймуннинг ўлгани рост бўлса, бунисиям ёлғон эмас-дир, жўрам!

– Ҳув ўша сиру савдолар очилмай кетди-я, Маҳмуд? – дейман хаёлим яна ўтмишга оғиб. – Жийдалини ўғри босганлари...

– Эҳ-ҳэ, қачонги гап! Ёпиқ қозон ёпиқлигича қолди. Энди кимдан сўрардингиз? Қирқ йиллардан ҳам ошиб кетган бўлса!

– Ҳар қандай сир-асрор қирқ йил ўтса ҳамки, бир кун келиб барибир очилади, дейдилар-ку?

– Накл-да бу. Очилмайдигани қирқ минг йилдаям жумбоклигича қолаверади. Бу нақлингиз бирор калаванинг учи-куйруғи қирқ йил дегандами топилиб қолгану ўшанда тўқилган бўлса ажаб эмас.

Мана шу тоғ-тошда хом сув ичиб улгайган бўлса ҳам
Маҳмуд жўрамизнинг калласи жойида, тўгри айтади у.

Мошинага ўтириб секин пастга жиламиз.

Этакда – Жийдали, жон Жийдали!

Хаёл олиб қочади.

Биргина ариқдан шунча одам сув ичса-я!

Лекин – қанча сир, қанча синоат!

“Гули-гули, – дейман ўзимча, – гули-гули...”

Мошина ҳалиги ҳовлини ёнлаб сойликка қайрилганида не бир ўй билан қўл чўзиб пешонадаги йўлойнани ўзимга қаратаман, ниманингdir алматини ахтаргандек аксимга разм соламан. Маҳмуд ажабланган каби бир назар ташлайди-ю, дарҳол йўлга ўгирилиб олади. Бир мошина аранг сифадиган торгина жой: эҳтиёт бўлмасангиз, жарга қулаб кетиш ҳеч гап эмас.